

四庫全書

史部

欽定四庫全書

史部

陝西通志卷六十一

詳校官監察御史臣劉湄

檢討臣德生覆勘

總校官降調編修臣倉聖脉

校對官中書臣高中

謄錄監生臣施華

欽定四庫全書

陝西通志卷六十一

人物七

忠節

周

富辰

郇人襄王大夫

鄭伐滑王使伯服游孫伯如鄭請滑鄭執

二子王怒將以狄伐鄭富辰諫王弗聽狄伐鄭取櫟

王德狄人將以其女為后辰諫王又弗聽王黜狄后

狄人來誅殺譚伯辰曰昔吾驟諫王王弗從以及此

難若其不出王其以我為懟乎乃以其屬死之

國語

子車奄息

秦大夫

交交黃鳥止於棘誰從穆公子車奄息

交交黃鳥止於桑誰從穆公子車仲行交交黃鳥止

於楚誰從穆公子車鍼虎

詩秦風

秦穆公卒以子車氏

之三子為殉皆秦之良也國人哀之為之賦黃鳥

詩經

注穆公與羣臣飲酒酣公曰生共此樂死共此哀於

是奄息仲行鍼虎許諾及公薨皆從死黃鳥之詩所

為作也

史記秦本紀注

漢

蘇武字子卿

建子杜陵人

天漢元年以中郎將持節送匈奴

使留在漢者與副中郎將張勝假吏常惠等俱至匈奴

匈奴欲降之使衛律召武受辭武引佩刀自刺律

驚自抱持武氣絕半日復蘇律謂武曰蘇君律前歸

匈奴擁衆數萬蘇君今日降明日復然空以身膏草

野誰復知之武不應律曰君今不聽吾計後雖欲復

見我尚可得乎武罵曰女畔主背親何以女為見律
知武終不可脅白單于乃幽武大窖中絕不飲食天
雨雪武臥齧雪與旃毛并咽之數日不死匈奴以為
神徙武北海無人處使牧羝武至海上廩食不至
掘野鼠去草實而食之仗漢節牧羊臥起操持節旄
盡落久之單于使李陵至海上置酒設樂謂武曰單
于聞陵與子卿素厚故使來說足下虛心欲相待武
曰武父子無功德皆為陛下所成就今得殺身自效

誠甘樂之願勿復再言陵數日復曰子卿一聽陵言
武曰自分已死久矣王必欲降請畢今日之懽效死
於前陵見其至誠喟然嘆曰嗟乎義士陵與衛律之
罪上通於天因泣下沾巾與武決去後陵復至海上
語武捕得雲中生口言吏民皆白服曰上崩武號哭
嘔血旦夕臨數月昭帝即位匈奴與漢和親漢求武
等匈奴詭言武死後漢使復至匈奴常惠教使者謂
天子射上林苑得雁足有繫帛書言武等在其澤中

單于驚謝漢使召會武官屬隨武還始元六年春至京師詔奉武一太牢謁武帝園廟拜為典屬國武留匈奴凡十九歲始以強壯出及還鬚髮盡白宣帝神

爵二年病卒圖畫麒麟閣

漢書本傳

段崇字禮高南鄭人太守鄭厓命為主簿涼州羌入漢中從厓屯褒中厓欲戰崇諫不可厓不聽出戰敗績崇及子勃兄子伯生等皆死羌遂得厓殺之程信字伯義南鄭人時為功曹居守馳來赴難殞殮厓喪結

故吏子第二十五人各募敢死士以待時太守鄧成
命為五官虜復來信等將其同志率先奮討大破之
信被八創死天子咨嗟賜信崇家穀數千斛有王宗
原展及嚴孳李容姜濟陳已曹廉勾矩劉旌九人皆
以令義為鄭厓所命王宗原展與厓同死孳容等七
人與信并命詔書賜九子家穀各五百斛

漢中士
女志

魯旭

諫子平
陵人

官太僕與王允共誅董卓李傕入長安旭

遇害

後漢書
魯恭傳

金元休名尚京兆人與同郡韋休甫第五休文俱著名號三休為兗州刺史東之郡而太祖已臨兗州尚依袁術術僭號欲以尚為太尉尚無屈意術亦不敢強也建安初尚逃還為術所害後喪至京天子嘉尚忠烈為之咨嗟詔百官弔祭拜子暉為郎

典畧

金禕字德禕

京兆人

自以世為漢臣覩漢祚將移與耿

紀韋晃吉本本子邈邈弟穆等結謀禕與王必善必典兵督許中事邈等率千餘人夜攻必禕遣人為內

應射必中肩必投禕夜喚德禕禕家不知是必謂為
邈等曰王長史已死乎必乃更他路奔南城會天明
邈等衆散故敗

三輔
錄注

韋康字元將京兆人康父端從涼州徵為太僕康代為
涼州刺史後為馬超所圍堅守歷時救軍不至遂為

超所殺

三輔
錄注

晉

傅祗字子莊泥陽人性至孝才識明練起家太子舍人

遷滎陽太守自魏黃初大水之後河濟汎溢祇造沈
萊堰自此兗豫無水患遷常侍左將軍楊駿輔政欲
悅衆心議普進封爵祇與駿書曰未有帝王始崩臣
下論功者也不從氏人齊萬年反以祇為行安西軍
司加常侍討平之趙王倫輔政以為中書監王戎陳
準等相與言曰傅公在事吾屬無憂矣懷帝即位東
海王越輔政祇既居端右明達國體朝廷制度多所
經綜大將軍苟晞表請遷都使祇出詣沔陰脩理舟

楫為水行之備洛陽陷遂共建行臺推祇為盟主傳檄四方徵義兵以暴疾薨祇自以義誠不終力疾手筆勅厲其二子宣暢辭旨深切覽者莫不感激慷慨

晉書傳
玄傳

魏浚東阿人寓居關中有幹用永嘉末與流民東保河陰之硤石時京邑荒儉浚掠穀麥獻懷帝及洛陽陷屯於洛北石梁塢撫養遺衆其附賊者解喻之恃遠不從命者遣將討之遠近感悅襁負至者甚衆劉琨

承制假浚河南尹劉曜忌浚得衆率軍圍之浚夜走
為曜所得遂死之贈平西將軍浚族子該一名亥劉
曜攻長安隨浚赴難守金墉城曜引去餘衆依之元
帝承制加冠軍將軍雍州刺史助周訪討平杜曾詔
以為順陽太守王敦反梁州刺史甘卓試以敦旨動
之該距而不應蘇峻反率衆救臺軍峻未平卒
晉書本傳
吉挹字祖冲蓮句人祖朗愍帝時為御史中丞西朝不
守朗嘆曰吾何忍君臣相隨北面事賊乎乃自殺挹

少有志節孝武帝初苻堅陷梁益桓豁表挹為魏興
太守尋加輕車將軍領晉昌太守以拒堅功拜員外
散騎侍郎苻堅將韋鍾攻魏興挹拒之斬七百餘級
加督五郡軍事鍾率眾欲趨襄陽挹邀擊斬五千餘
級鍾怒回軍圍之挹又屢挫其銳後賊眾繼至挹力
不能抗賊城將陷挹引刀欲自殺友人逼奪其刀會
賊執之挹閉口不言不食而死追贈益州刺史

晉書
本傳

傅弘之字仲度泥陽人父韶晉梁州史弘之少儻有

大志舉秀才不行義旗建輔國將軍道規以為參軍
盧循作亂桓石綏自號荊州刺史王天恩自號梁州
刺史襲西城時韶為梁州遣弘之討石綏等斬之除
太尉行參軍高祖北伐弘之與扶風太守沈田子等
七軍自武關入偽上洛太守脫走進據藍田招懷戎
晉晉人龐斌之羌人康橫等各率部歸化進為桂陽
公除畧陽太守徐師高叛弘之討平之高祖歸後勃
勃偽太子赫連瓚率眾三萬襲長安弘之領步騎五

千於池陽破之。璣又抄掠渭南。弘之又於寡婦渡破璣，掠七千餘口。義真東歸，勃勃傾國追躡於青泥。大戰，弘之軍敗陷沒，逼令降，不屈，見殺。時年四十二。

宋書

本傳

梁

韋粲字長倩，杜陵人，好學，仗氣。太清二年，為散騎常侍。粲聞侯景作逆，簡閱部下得精卒五千，馬百疋，倍道赴援。至豫章，奉命報云：賊已出橫江。粲就內侍劉孝

儀謀之孝儀曰必期如此當有別勅豈可妄相驚動
時孝儀置酒粲怒以杯抵地曰賊已渡江便逼宮闕
水陸俱斷何暇有報假令無勅豈得自安韋粲今日
何情飲酒即馳馬出以輕舸就路至南洲司州刺史
柳仲禮亦帥步騎萬餘人至橫江粲即送糧仗贍給
并散私金帛以賞其戰士建議推仲禮為大都督進
軍次新亭是夜仲禮入粲營部分衆軍令粲頓青塘
粲帥所部水陸俱進時值昏霧軍人失道比及青塘

夜已過半壘柵至曉未合景率銳卒來攻軍副王長茂勸據柵待之粲不從令軍主鄭逸逆擊之遂敗賊乘勝入營左右牽粲避賊粲不動叱子弟力戰兵死畧盡遂見害子尼及三弟助警構從弟昂皆戰死賊傳粲首以示城內太宗聞之流涕曰社稷所寄惟在韋公如何不幸先死行陣詔贈護軍將軍世祖平侯景追諡曰忠貞並贈助警構及尼皆中書郎昂員外散騎常侍粲長子臧字君理歷官東宮領直侯景至

帥兵屯西華門城陷奔江州收舊部曲據豫章為部

下所害

梁書
本傳

北魏

王洛兒京兆人明元在東宮給事帳下性謹愿未嘗有
過明元嘗獵於灋南乘冰而濟冰陷沒馬洛兒投水
奉帝出殆將凍死帝解衣賜之恩寵日隆天賜末帝
避難居外洛兒晨夜侍衛恭勤發於至誠元紹之逆
帝晝居山嶺夜還洛兒家洛兒冒難往返京都通問

大臣大臣遂出奉迎明元還宮社稷獲全洛兒有功

焉太宗即位拜散騎常侍賜爵新息公卒贈太尉太

宗親臨哀慟者數四子長城襲爵

北史本傳

宿查干

石祖朔方人

世祖時虎賁幢將從征平涼有功賜爵

安漢男遷給事討蠕蠕戰歿

魏書宿石傳

蘇湛字景儁魏侍中則之後舉秀才蕭寶夤之討關西

以湛為行臺郎中深見委任孝昌中寶夤反時湛臥

疾於家寶夤報湛云死生榮辱與君共之湛聞之舉

聲大哭曰為我白齊王王本以窮鳥投人賴朝廷假
王羽翼不能竭忠報德乃欲乘人間隙有不臧之心
蘇湛不能以百口為王族滅願乞骸骨還鄉里寶寅
素重之聽還武功寶寅敗莊帝即位徵補尚書帝謂
曰聞卿答寶寅甚有美辭湛頓首謝曰臣與寶寅周
旋契濶言得盡心而不能令其守節臣之罪也莊帝
大悅加散騎侍郎尋遷中書病還鄉里終於家

魏書
本傳

韋元恢杜陵人有氣幹孝昌初值刺史元法僧外叛元

恢招聚同志潛規克復事泄為法僧所害時人傷之

魏書章
閔傳

泉企字思道上洛豐陽人曾祖景言魏建節將軍世襲
本縣令父安志復領本縣企九歲喪父哀毀類成人
年十二鄉人詣州請企為縣令魏宣武帝詔從所請
企雖童幼而好學恬靜百姓安之孝昌初加龍驤將
軍除上洛郡守蕭寶夤反遣其黨郭子恢襲據潼關
企率鄉兵三千人拒之連戰數日子弟死者二十餘

人遂大破子恢以功拜征虜將軍寶寅又遣兵萬人趨青泥圖取上洛豪族泉杜二姓密應之企與刺史董紹宗潛兵掩襲二姓散走寶寅亦退遷浙州刺史永安中梁將王元真寇荊州加企持節都督率眾援之過於順陽與戰大破之除東雍州刺史企性清約纖毫不擾於民每於鄉里運米自給孝武初齊神武專政魏帝有西顧之心欲委企以山南之事乃除洛州刺史當州都督未幾帝西遷齊神武率眾至潼關

企遣子元禮禦之上洛人泉岳其弟猛畧與拒陽人
杜窰等謀翻洛州以應東軍企知之殺岳及猛畧等
窰亡投東魏大統初進爵上洛郡公三年高敖曹圍
逼州城杜窰為鄉導企拒守旬餘矢盡援絕城乃陷
企謂敖曹曰泉企力屈志不服也及竇泰被擒敖曹
遂執企而東以杜窰為刺史企臨發密誡子元禮仲
遵致力本朝餘無所言聞者莫不憤歎尋卒於鄴元
禮少有志氣好弓馬釋褐奉朝請本州別駕累遷散

欽定四庫全書

卷六十一

騎常侍洛州陷與企俱被執而東於路逃歸時杜窋雖為刺史然邑人素輕杜而重泉及元禮至與仲遵相見感父臨別之言潛與豪右結託信宿之間遂率鄉人襲州城斬窋傳首長安朝廷嘉之拜車騎大將軍世襲洛州刺史從戰沙苑為流矢所中卒仲遵少謹實涉獵經史年十四為本縣令及長有武藝每從父兄征討以勇決聞高敖曹攻洛州企令仲遵出戰衆寡不敵為流矢中目不堪復戰及城陷仲遵以被

傷不行後與元禮斬寇以功封豐陽伯加授征東將軍豫州刺史及元禮於沙苑戰歿復以仲遵為洛州刺史隨于謹攻柏谷塢力戰先登擒其將王顯明復會大軍戰於邛山授荊州刺史仲遵雖出自巴夷而有方雅之操歷官以清白見稱朝廷以其父臨危抗節令襲爵上洛郡公恭帝初徵拜左衛將軍尋出為

金州刺史武成初卒諡曰莊

周書泉
企傳

韋祐字法保山北人祖駢中書博士父義上洛郡守法

保少好遊俠人有急難投之者多保存之父歿事母兄以孝敬聞慕李長壽之為人遂娶長壽女因寓居關南正光末拜員外散騎侍郎孝武西遷除右將軍及長壽被害其子延孫收餘衆守禦東境朝廷恐延孫兵少不能自固乃除法保東洛州刺史配兵數百人以援延孫法保遂倍道兼行東魏陝州刺史劉貴以步騎邀之法保命所部為圓陣且戰且前數日得與延孫兵接乃并勢置柵於伏流未幾太祖徵法保

與延孫還朝賞勞甚厚授大都督除河南尹頻與敵人交兵每身先士卒單馬陷陣嘗至關南與東魏人戰流矢中頸從口中出當時氣絕輿至營久之乃蘇拜車騎大將軍鎮九曲城加驃騎大將軍會東魏遣軍送糧饋宜陽法保潛邀之轉戰數十里兵少不敵為流矢所中卒諡曰壯

周書本傳

北周

楊敷字文衍華山公寬之兄子父暄歷輔國將軍諫議

大夫以別將從魏廣陽王深征葛榮為榮所害贈華州刺史敷少有志操重然諾每覽書傳見忠臣烈士之事常慨然景慕之魏建義初襲祖鈞爵臨貞縣伯天和六年出為汾州刺史齊將段孝先率衆五萬來寇梯衝地道晝夜攻城敷親當矢石隨事扞禦拒守累旬攻之愈急時城中兵不滿二千戰死者已十四五糧儲又盡公私窮蹙齊公憲總兵赴救憚孝先不敢進軍敷知陷沒乃召其衆謂之曰吾等糧絕今欲

突圍出戰死生一決於諸君意何如衆咸涕泣從命
乃率兵夜出擊殺齊軍數十人俄而孝先率諸軍盡
銳圍之數殊死戰矢盡為孝先所擒齊人方欲任用
之數不為屈遂卒於鄴高祖平齊贈使持節大將軍

諡曰忠壯

周書
本傳

韓盛字文熾南陽堵陽人五世祖遠為鄭縣令因徙居
京兆之渭南幼有操行涉獵經史兼善騎射膂力過
人大統初起家開府行叅軍從李遠積年征討每有

戰功累遷至大都督出為新平郡守居守清靜嚴而不殘矜恤孤貧抑挫豪右賊盜止息郡治肅然尋以本官從晉公護東討於洛陽戰歿贈浙洛義三州刺史謚曰壯子謙嗣官至大都督兄德興歷官邵州刺史仲恭歷廣原靈原新豐三縣令所在皆有聲績有八子並有志操少子紛約後最知名

周書楊
標傳

韋總字善會

孝寬子
杜陵人

聰敏好學位京兆尹帝嘗戲總曰

卿師尹帝鄉故當不以富貴威福鄉里耶總正色對

曰陛下擢臣非分竊謂已鑒愚誠今奉嚴旨便似未
照丹赤豈可久忝此職用疑聖慮請解印綬以避賢
能帝大笑曰前言戲之耳五年從武帝東征每率麾
下先驅陷敵遂於并州戰歿贈上大將軍追封河南
郡公諡曰貞

北史章
孝寬傳

隋

趙世模初事高寶寧後以衆歸周授上開府寓居京兆
之雲陽高祖踐祚恒典宿衛迨同晉王伐陳先鋒遇

賊力戰而死朝廷以身死王事令子元淑襲本官

隋書

趙元淑傳

張定和字處謚萬年人少貧賤有志節初為侍官從上柱國李克擊突厥先登陷陣虜刺之中頸定和以草塞瘡而戰神氣自若虜遂敗走上聞而壯之進位柱國封武安縣侯煬帝嗣位拜宜州刺史尋轉河內太守頗有惠政歲餘從帝征吐谷渾定和挺身登山賊伏兵於巖谷之下發矢中之而斃謚曰壯武子世立

嗣尋拜為光祿大夫

隋書
本傳

韋洸字世穆

世康兄
杜陵人

性剛毅有氣幹少便弓馬隋文帝

為丞相從季父孝寬擊尉遲迥於相州以功拜柱國
進襄陽郡公時突厥寇邊令洸統兵出原州擊破之
拜江陵總管陳平拜江州總管畧定九江遂圖嶺南
上與書慰勉之洸至廣州嶺表皆降上聞而大悅許
以便宜從事拜廣州總管歲餘番禺夷王仲宣反以
兵圍洸洸拒之中流矢卒贈上柱國諡曰敬子協字

欽仁好學有雅量位秘書郎其父在廣州上命協齋
詔勞問未至而父卒上以其父死王事拜柱國歷定

息秦三州刺史有能名

北史韋
世康傳

韋福獎

世康少子
杜陵人

通事舍人在東都與楊玄感戰沒

北史

韋世
康傳

楊武通華陰人性果烈善馳射數以行軍總管討西南
夷以功拜左武衛將軍歷岷蘭二州總管復與周法
尚討叛獠法尚軍不利武通束馬懸車出賊不意頻

戰破之賊知其孤軍無援傾部落而至武通轉鬪數
百里為賊所拒四面路絕武通輕騎挑戰墜馬為賊
所執殺而噉之

北史劉
方傳

陶模京兆人性明敏有器幹仁壽初為嵐州司馬諒既
作亂刺史喬鍾葵發兵將赴逆模拒之曰漢王所圖
不軌公荷國厚恩致位方伯謂當竭誠效命以答慈
造豈有大行皇帝梓宮未掩翻為厲階鍾葵失色曰
司馬反邪臨之以兵詞氣不撓鍾葵義而釋之軍吏

進曰若不斬模何以壓衆心於是囚之於獄及諒平
煬帝嘉之拜開府授大興令楊玄感反率兵從衛元
擊之以功進位銀青光祿大夫卒官

隋書
本傳

劉韶

文靜父
武功人

仕隋戰死贈上儀同三司

唐書劉
文靜傳

楊善會字敬仁華陰人大業中為郿令以清正聞俄而
山東饑饉百姓相聚為盜善會以左右數百人逐捕
之往皆克捷其後賊帥張金稱屠城剽邑善會率所
領與賊捕戰數挫其鋒於時郡縣微弱陷沒相繼能

抗賊者惟善會而已金稱將數百人招集餘黨善會
追捕斬之進拜清河通守其年從楊義臣斬漳南賊
帥高士達士達部將竇建德復擾清河善會逆拒之
為賊所執建德禮之用為貝州刺史善會罵之曰老
賊何敢擬議國士我豈屠酤兒輩敢欲更相吏邪於
是害之

隋書
本傳

張季珣京兆人父祥少為高祖所知開皇中累遷并州
司馬仁壽末漢王諒舉兵反遣其將劉建畧地燕趙

至井陘祥勒兵拒守建攻之復縱火燒其郭下百姓驚駭其城側有西王母廟祥登城望之再拜號泣而言曰百姓何罪致此焚燒神其有靈可降雨相救須臾驟雨其火遂滅士卒感其至誠莫不用命月餘援軍至賊遂退走以功授開府入為都水監卒官季珣少慷慨有志節大業末為鷹揚郎將其府據箕山為固與洛口連接及李密陷倉城遣人呼之季珣罵密極口密怒遣兵攻之連年不克時密眾數十萬季珣

四面阻絕而執志彌固誓以必死經三年糧盡士卒
羸病不能拒戰遂為所陷季珣坐聽事顏色自若羣
賊曳季珣殺之時年二十八其弟仲琰大業末為上
洛令及義兵起率吏人城守部下殺之以歸義仲琰
弟琮為千牛左右宇文化及之亂遇害季珣家素忠
烈兄弟俱死國難論者賢之

隋書
本傳

沈光字總持吳興人父君道仕陳陳滅家於長安光少
驍捷善戲馬常慕立功名不拘小節大業中徵天下

驍果之士光預焉同類皆出其下及帝攻遼東以衝
梯擊城竿長十五丈光升其端臨城與賊戰賊競擊
而墜適竿有垂絙光接而復上帝壯之即日拜朝請
大夫江都之難潛構義勇為帝復讎光身無介冑遂
為所害壯士聞之莫不隕涕

隋書
本傳

唐宗

休璟祖京兆始平人

隋大業末為朔方郡丞梁師都舉兵將

據城宗抗節不從為所害

舊唐書唐
休璟傳

王辯字警畧蒲城人少習兵書尤善騎射漢王諒作亂

從楊素討平之賜爵武寧縣男遼東之役以功加通
議大夫山東賊帥等寇掠河北辯進兵擊之所往皆
捷深為羣賊所憚翟讓寇徐豫辯頻擊走讓與李密
屯據洛口倉辯與王世充討密阻洛水相持經年辯
率諸將攻敗密因薄其營戰破外柵密諸營已有潰
者乘勝將入城世充不知鳴角收兵翻為密徒所乘
官軍大潰不可救止辯至洛水橋已壞竟溺死焉

隋書

本傳

骨儀京兆長安人性剛鯁有不可奪之志開皇初為侍御史處法平當不為勢利所回煬帝嗣位遷尚書右司郎時朝政漸亂濁貨公行儀勵志守常介然獨立超拜京兆郡丞公方彌著時刑部尚書衛元兼領京兆內史頗行詭道輒為儀所執正元不能傷也義兵至元恐禍及遂稱老病儀與陰世師同心叶契父子

並誅

隋書
本傳

唐

劉感岐州鳳泉人武德初以驃騎將軍戍涇州為薛仁
果所圍糧盡殺所乘馬啖士而煮骨自飲至和木屑
以食城垂陷長平王叔良救之乃解與叔良出戰為
賊執還圍涇州令感約城中降感給諾至城下大呼
曰賊大饑亡在朝暮秦王數十萬眾且至勉之無苦
仁果怒執感埋其半土中馳射之至死罵益甚賊平
高祖購得其尸祭以少牢贈瀛州刺史諡忠壯詔其

子嗣封爵賜田宅焉

唐書
本傳

楊大寶

炎曾祖
天興人

為龍門令劉武周攻之死於守贈全節

侯

唐書楊
炎傳

靳孝謨武功人為金紫光祿大夫武德二年正月遣孝

謨安集邊郡為梁師都所獲孝謨罵之極口師都殺

之二月詔追賜爵武功縣公諡曰忠

通鑑

盧士叡劉黑闥之亂死事者又有盧士叡李元通士叡

客韓城隋亂結納英豪高祖與之舊及兵興率數百

人上謁汾陰又使兄子諭降劇賊孫華與劉弘基敗

隋將桑顯和於飲馬泉擢瀛州刺史黑闥遣輕騎破其郭拒戰半日叡為賊禽欲使說下城堡不從見殺元通藍田人高祖入關率所部自歸拜定州總管為黑闥所破愛其才欲以為將元通曰吾當守節以報烏能降志耶不聽囚之故吏有餉欲餽者元通曰諸君見哀吾能一醉遂縱飲謂守者曰吾能劍舞可借刀守士與之曲終仰天太息曰大丈夫撫方面不能保所守尚何惕息耶乃潰腹死帝為流涕擢其子伏

護大將軍

唐書忠義傳

安金藏長安人在太常工籍睿宗為皇嗣有誣皇嗣異謀者武后詔來俊臣問狀左右欲引服金藏大呼曰公不信我言請剖心以明皇嗣不反引佩刀自刺腹中腸出被地眩而仆武后聞大驚輿致禁中命高醫納腸褫桑杜紕之閱夕而蘇后臨視嘆曰吾有子不能自明不如爾之忠也即詔停獄睿宗乃安神龍初母喪葬南闕口營石墳晝夜弗息地本印燥泉忽湧

流廬之側李冬有花犬虎相擾本道使盧懷慎上其事詔表闕於閭擢右驍衛將軍卒諡曰忠以子承恩為廬州長史中和中擢其遠孫敬則為太子右諭德

唐書

本傳

韋安石萬年人祖津陵州刺史父琬成州刺史安石舉明經蘇良嗣薦於武后擢膳部員外郎遷并州司馬有善政安石性方重不苟言笑政尚清嚴吏民尊畏久視中遷文昌右丞時二張及武三思寵橫安石數

折辱之易之引蜀商博塞后前安石奏商等賤類不當戲殿上顧左右引出坐皆失色后以安石辭正改容慰勉后幸興泰宮議趨疾道安石曰千金子且誠垂堂況萬乘可乘危哉后為回輦睿宗立復為侍中中書令太平公主有異謀欲引安石數邀之拒不往帝一日召安石曰朝廷傾心東宮卿胡不察曰太子仁孝天下所稱且有大功陛下今安得亡國語此必太平公主計也帝矍然曰卿勿言朕知之主竊聞乃

構飛變欲訊之賴郭元振保護免俄罷政事遷蒲州
刺史太常卿姜皎有所請拒之皎奏安石護作定陵
有盜沒詔籍其贓安石乃發憤卒天寶初贈左僕射
郇國公諡文貞二子陟斌陟字殷卿累遷吏部侍郎
楊國忠忌其才貶桂嶺尉徙平樂肅宗即位永王兵
起委陟招諭授江東節度使與高適來瑒會安州推
瑒為地主為載書登壇辭旨慷慨士皆隕泣永王敗
除御史大夫拜吏部尚書卒諡忠孝斌父為相特授

太子通事舍人嚴峭有大臣體天寶中為中書舍人

祿山陷洛陽斌為賊得憂憤卒贈秘書監

唐書本傳

王孝傑新豐人少以軍功進長壽元年為武威道總管

克龜茲于闐疏勒碎葉等城武后曰貞觀中西境在

四鎮其後不善守棄之吐蕃今故土盡復孝傑功也

進鳳閣鸞臺三品契丹李盡忠等叛詔為靖邊總管

將兵討之軍至東硤石谷與賊戰後軍不至為虜所

乘軍潰孝傑墮谷死贈耿國公以其子無擇為朝散

大夫

唐書
本傳

高叡萬年人舉明經歷趙州刺史聖厯初突厥默啜入
寇叡嬰城拒虜攻益急長史唐波若度且陷即與虜
通叡覺之力不能制即自經不得死為虜執使降諭
諸縣不肯應見殺初虜至有為叡計者突厥蠡銳所
向無完公不能抗且當下之答曰我刺史不戰而降
罪大矣武后嘆息贈冬官尚書諡曰節詔誅波若籍
其家下制褒叡忠節波若臣賊使天下知之子仲舒

通故訓學擢明經開元初宋璟蘇頲當秉多咨訪焉
時舍人崔琳練達政宜璟等禮異之語人曰古事問
高仲舒時事問崔琳何復疑終太子右庶子

唐書本傳

王海賓

忠嗣父華州鄭人

官太子右衛率豐安軍使開元二年

吐蕃寇隴右詔隴右防禦使薛訥率杜賓客郭知運
王駿安思順禦之以海賓為先鋒戰武階追北至壕
口殺其衆進戰長城堡諸將媚其功按兵顧望海賓
戰死大軍乘之斬賊萬七千級獲馬七萬牛羊十四

萬玄宗憐其忠贈左金吾大將軍

唐書王忠嗣傳

賈循京兆華原人蘇頲嘗謂今頗牧為益州表署列將
敗吐蕃於西山三遷靜塞軍營田使母亡將葬宅有
枯桑一夕再生芝出北墉人以為瑞玄宗以循有功
詔贈其父常山太守祿山反使循守幽州故杲卿招
之以傾賊巢穴循許可為向潤客等發其謀賊縊之
建中二年贈太尉諡曰忠從子隱林為永平兵馬使
當入衛屬朱泚難率眾扈行在德宗見隱林偉其貌

問家世答曰故范陽節度副使循臣從父也帝異之
令糾察行在遷檢校右散騎常侍封武威郡王賊圍
急隱林冒矢石死戰已而圍解羣臣稱慶卒贈尚書

左僕射

唐書
本傳

顏杲卿字昕與真卿同五世祖父元孫為濠州刺史杲
卿以蔭調遂州司法參軍與兄春卿弟曜卿並以書
判超等遷范陽參軍安祿山聞其名表為假常山太
守祿山反杲卿及長史袁履謙謁於道賜杲卿紫袍

履謙緋袍杲卿指所賜衣謂履謙曰與公何為著此履謙悟乃與真定令賈深內丘令張通幽定謀圖賊使子泉明往返計議時真卿在平原陰養死士為拒守計遣甥盧逖至常山約起兵斷賊北道杲卿大喜以為兵犄角可挫賊西鋒玄宗拜杲卿衛尉卿兼御史中丞履謙常山太守即傳檄河北言王師二十萬入土門遣郭仲邕引百騎為先鋒馳而南於是趙鉅鹿廣平河間並斬偽刺史傳首常山杲卿兄弟兵大

振祿山聞兵興大懼使史思明等率兵攻常山兵少未及為守計六日而陷與履謙同執賊脅使降不應取少子季明刎頸上曰降我當活爾子杲卿不答遂並盧逖殺之杲卿至洛陽祿山怒曰吾擢爾太守何所負而反杲卿瞋目罵曰汝牧羊羯奴耳天子負汝何事而反我唐臣守忠義恨不斬爾以謝上祿山不勝忿節解以肉噉之詈不絕賊鉤斷其舌曰復能詈否杲卿含胡而絕履謙斷手足賊鬻之杲卿宗子近

屬皆被害乾元初贈太子太保諡忠節建中中又贈
司徒泉明購尸葬長安鳳栖原泉明有孝節常山陷
客壽陽真卿為蒲州刺史令泉明到河北求宗屬始
一女及姑女並流離賊中及是并得之悉錢贖姑女
還取貲復往則已女復失之履謙及父故將妻子尚
三百餘人不能自存泉明悉力贍給殯父與履謙分
柩護還長安履謙妻疑斂具儉狹發視之與泉卿等
乃號踊待泉明如父肅宗拜泉明鄆令政化清明遷

潮州司馬居官廉飭鬻不給居母喪哀毀骨立當世
以為難春卿倜儻通當世務舉明經終偃師丞沈盈
者亦杲卿甥有行義釋褐博野尉與杲卿同死難

唐書

本傳

龐堅涇陽人歷潁川太守安祿山反南陽節度使魯炆
表堅為長史兼防禦副使以薛愿為潁川太守共守
潁川賊將阿史那承慶悉銳攻之愿堅晝夜戰諸郡
兵無援者自正月盡十一月賊設木鷲衝車飛梯薄

城矢如雨士皆雷譟夜半踰城入二人不肯降賊紼致東京將磔解之有說祿山者曰義士也彼為其主殺之不祥乃縛於樹比且死見者哭之

唐書本傳

蘇震

說子武功人

以蔭補千牛累遷殿中侍御史祿山陷京

師震棄家出奔會肅宗興師靈武震晝夜馳及行在

帝嘉之拜御史中丞終太常卿

唐書蘇瓌傳

韓浩

休子長安人

萬年主簿弟洪為華州刺史洪弟渾大理

司直安祿山盜京師皆陷賊賊逼以官將走行在浩

洪渾及洪四子復為賊擒殺之洪善與人交有節義藉甚於時見者為流涕肅宗以臣子能死難詔贈浩

吏部郎中洪太常卿渾太常少卿

唐書韓休傳

郭盱

子儀子鄭人

賊安守忠壁永豐倉子儀遣子盱與戰多

殺至萬級盱死於陳盱弟晞善騎射復兩京戰最力

累進鴻臚卿吐蕃回紇入寇加御史中丞援邠州擊

虜破之居父喪值朱泚亂南走山谷賊昇致之欲汙

以官陽瘖不答賊脅之不動數以城中事貽書李晟

既而奔奉天天子還改太子賓客封趙國公晞弟曙
累官司農卿德宗幸奉天曙方獵苑北聞蹕至從乘
輿入駱谷與功臣子李昇韋清令狐建李彥輔被甲
請見言南行路險且虞姦變臣等相誓願更挾帝馬
許之帝還擢金吾大將軍終祁國公

唐書郭
子儀傳

李嗣業高陵人開元中從安西都護來曜討十姓蘇祿
累功署昭武校尉後安西軍中初用陌刀而嗣業尤
善所嚮摧北高仙芝討勃律署嗣業為陌刀將時吐

蕃兵十萬據山瀕水以扼王師嗣業提步卒升山顏石四面擊賊虜大潰鼓而驅至勃律禽其主授右武衛將軍從平石國以跳盪先鋒加特進諸胡連兵攻四鎮仙芝為大食所敗嗣業馳守白石嶺會拔汗那還兵塞道嗣業手挺麈擊人馬斃仆者數十百虜駭走仙芝乃得還進右金吾大將軍疏勒鎮使安祿山反肅宗詔至即引道廣平王收長安嗣業統前軍賊酋李歸仁擁精騎薄戰王師亂不能陣嗣業袒持長

刀殺數十人陣復整步卒以陌刀長柯斧堵進所向
無前斬首六萬級遂平長安進收東都封虢國公兼
北庭節度使與子儀等圍相州師老諸將無功獨嗣
業披堅數奮為諸軍冠中流矢臥帳中方愈忽聞金
鼓知與賊戰大呼創潰流血數升而卒諡曰忠勇嗣
業忠毅憂國不計居產前後賞賜皆以助軍

唐書
本傳

程千里萬年人長七尺魁岸有力應募磧西累官安西
副都護天寶末安祿山反詔募兵河東即拜節度副

使雲中太守遷上黨長史至德二載賊將蔡希德圍上黨千里恃勇開門率百騎欲直擒希德幾得而救至乃退會橋壞馬顛為賊執仰首勅諸騎使還曰為我報諸將可失帥不可失城軍中皆為泣下賊還囚

千里至東都

唐書本傳

郭昕子儀母弟幼明子肅宗末為四鎮留後會吐蕃陷關隴昕率將士閉境拒守北庭去西安七千餘里數遣使奉表皆不達聲問絕者十七年代宗朝昕密遣

間使自回紇中來

華州志

令狐彰富平人父潁天寶中尉范陽彰遂少長范陽侗儻有膽氣涉獵書傳知大義事安祿山史思明僞署博滑州刺史鎮滑臺彰感激忠義思立名節乃潛謀歸順募勇士善水者乘夜涉河表請以所管賊一將兵馬及州縣歸順肅宗大悅賜書慰勞時彰移鎮杏園渡遂為思明所疑遣所親薛岌圍攻之彰明示三軍曉以逆順衆心感附與賊戰大破之遂以麾下入

朝肅宗深獎之禮甚優厚拜御史中丞兼滑州刺史
鎮滑州在職數年田疇大闢庫藏充積歲奉王稅及
脩貢獻未嘗暫闕時吐蕃犯邊徵兵防秋彰遣屬吏
部統營伍自滑至京師率自齎糧所過供擬皆讓不
受識者稱之子建大厯四年入朝特加兼御史中丞
歸滑州彰卒三軍逼奪情建守死不從舉家歸京師
轉右龍虎軍使德宗出幸奉天建方教射軍中遂以
四百人隨駕為後殿加檢校左散騎常侍

舊唐書
本傳

馮河清京兆人始隸郭子儀軍以戰多拜左衛大將軍
後從涇原節度馬璘克兵馬使數以偏師與吐蕃遇
多効級名聞軍中建中時姚令言討關東以河清知
留後行師過闕有急變德宗走奉天河清召諸將計
事東向哭相勵以忠衆無異言即發儲鎧完仗百餘
乘獻行在披堅勒兵軍聲大振拜河清涇原節度使
安定郡王朱泚數遣謀人誅之河清輒斬以徇興元
元年田希鑒害河清京師平贈河清尚書左僕射再

贈太子少傅

唐書本傳

辛讜

雲京孫京兆人

初事李嶧性廉勁居揚州慨然常有濟時

意龐勛反攻杜慆於泗州讜聞之挈舟趨泗口貫賊

柵以入慆素聞其名握手曰吾僚李延樞常為吾道

夫子為人何意臨教吾無憂矣賊將李圓焚淮口讜

曰事棘矣獨出可以求援乃夜踰淮馳至洪澤見戍

將郭厚本告急大將袁公异等曰賊衆我寡不可往

讜拔劍瞋目呼曰泗州陷在旦夕吾今斷左臂殺君

去推劍直前厚本持之公异僅免厚本決許付兵五
百讜徧問士曰能行乎皆曰諾讜泣以謝衆擊賊大
敗人心遂固圍三月救兵敗城益危讜復請乞兵與
壯士持斧夜斬賊柵出見節度使令狐綯復詣浙西
見杜審權合兵五千路梗不得進讜引兵決戰斬賊
六百級乃克入惛迎泣表其功於朝授監察御史圍
凡十月乃解初讜求救過家十餘未嘗見妻子後以
功第一拜亳州刺史乾符末終嶺南節度使

唐書
本傳

杜惔

惔弟杜陵人

咸通中為泗州刺史會龐勛反圍城處士

辛儼勸惔出家屬獨以身守惔曰吾出百口求生衆
心搖矣不如與將士死生共之衆聞皆泣下惔完濬
城隍閱器械無不具賊將李圓易惔馳勇士百人欲
入封府庫惔為好言厚禮迎勞賊不虞惔之謀明日
伏甲士三百宴毬場賊皆殲焉圓怒傳城戰惔殺數
百人圓退未幾賊焚淮口晝夜戰不息惔使人間道
走京師詔戴可師以沙陀吐谷兵二萬招討淮南節

度使令狐綯遣牙將李湘屯淮口為圓所敗湘等並
沒於是援絕賊乃以鐵鎖絕淮流梯衝乘城懿宗遣
使加惲檢校右散騎常侍勉以堅守勛遣圓入城見
惲約降惲怒殺之勛累攻不得志會招討使馬舉率
兵至遂解去圍凡十月惲拊循士卒皆殊死戰卒完
一州時稱為難賊平遷義成軍節度使檢校兵部尚

書卒

唐書杜佑傳

杜讓能字羣懿

審權子
杜陵人

擢進士第為集賢校理稍進兵

部員外郎僖宗狩蜀奔謁行在三遷中書舍人為翰林學士方兵興調發綏徠讓能處事機無所遺算帝倚重之從還京師再遷兵部尚書李克用兵至帝夜出讓能徒步從之朱玫兵逼帝狩梁是時棧道為南山石君涉所毀間關險澁讓能未嘗去側帝次褒中擢兵部侍郎同平章事於時貢賦不輸行在衛兵往往乏食讓能遣使入河中諭王重榮榮果奉詔京師平進中書侍郎昭宗立累進太尉李茂貞守鳳翔恃

有功不奉法帝詔茂貞領興元武定以徐彥若為鳳翔節度使茂貞不赴鎮帝怒詔讓能計議曰卿為我國之朕自以兵屬諸王讓能泣曰陛下之心憲祖心也但時有所未便他日臣蒙晁錯之誅顧不足弭七國患然敢不奉詔景德二年以嗣覃王為詔討使率師送彥若赴鎮茂貞迎戰蓋屋覃王敗讓能曰臣固豫言之請歸死以紓難乃賜死弟彥林御史中丞弘徽戶部侍郎皆及誅帝痛之後贈太師子光又次子

曉不復仕

唐書杜如晦傳

韋昭度字正紀京兆人擢進士第踐歷華近累遷中書
舍人僖宗西狩進同平章事還京授司空再狩南山
還次鳳翔李昌符亂昭度質家族於禁軍誓共討賊
士感動乃平昌符昭宗即位封岐國公進太傅王行
瑜求為尚書令昭度建言太宗由是即位後人臣無
復拜者郭子儀有大功嘗授之因辭免況行瑜乎乃
更號尚父行瑜怨請貶之未及報而行瑜收昭度於

都亭殺之後追贈太尉

唐書本傳

于琮字禮用高陵人休烈曾孫擢第授左拾遺咸通八年同平章事拜尚書右僕射黃巢陷京師以病臥家巢欲起為相琮辭疾賊迫脅不止乃曰吾死在旦夕位宰相義不受污賊遂害之

唐書于琮傳

王徽字昭文京兆人第進士廣明元年為戶部侍郎同平章事是日黃巢入關僖宗西狩徽追帝不及為賊所執將汙以官徽陽瘖不答以刃環脅卒不動久之

守者懈乃奔河中裂縑書章遣人間走蜀詔拜兵部尚書京城四面宣慰催陣使更為租庸供軍使因請赦沙陀罪令赴難其夏沙陀會諸軍遂平京師遷右僕射大亂之後宮觀焚殘園陵發掘徽克京畿安撫制置脩奉使外調兵食內撫流亡踰年稍稍完聚即奉表請帝東還進檢校司空御史大夫仍權京兆尹宦要家爭遣人治第侵冒齊民訟訴滿前徽一平以法由是為左右所憎遂移疾免昭宗立授吏部尚書

大順元年卒贈司空諡曰貞

唐書本傳

宋

韓杲華州鄭人為曲陽主簿及寇攻城陷歿焉

宋史韓丕傳

蔣偕字齊賢華州鄭縣人幼貧有立志父病嘗刲股以療父愈詰之偕曰情之所感實不自知也舉進士為大理寺詳斷官密州豪人王泚使奴殺一家四人偕當泚及奴皆大辟宰相陳堯佐欲寬泚持之不從偕以是知名歷知汾涇二州徙原州邊民苦屬戶為鈔

盜偕得數輩腰斬境上盜為息珠明康奴諸族數為
寇偕潛兵伺之斬首四百徙華州鈐轄湖南蠻唐和
內寇徙潭州賊平知忻州儂智高反除韶州團練使
廣南東西路鈐轄軍次賀州太平場賊夜入營襲殺
之贈武信軍節度觀察留後

宋史
本傳

劉懷忠保安軍人官內殿崇班閣門祇候元昊叛厚以
金幣及王爵招之懷忠毀印斬使洎入寇力戰以死

宋史
本傳

高永能字君舉綏州人少有勇力善騎射由行伍補殿
侍稍遷供奉官种諤取綏州發永能兵六千先驅入
囉兀五戰皆捷治綏德城闢地四千頃增戶千三百
即知城事元豐初為鄜延都監秋大稔夏人屯一千
騎於大會坪將取稼永能簡精騎突過其營騎卒驚
潰獲鈴轄二人轉六宅使夏人患之令曰有得高六
宅者賞金等其身四年西討永能為前鋒鏖戰於無
定河斬首數千級得馬三千橐駝牛羊萬計進東上

閣門使永樂之役獻謀皆不用城既陷其孫昌裔欲拔之從間道出永能歎曰此吾死所也易一卒敝衣戰而死其子世亮與昌裔求得尸以歸邊人無不痛惜詔贈房州觀察使永能之亡延州將皇城使寇偉亦力戰而沒贈均州防禦使

宋史本傳

張確字子固邠州宜祿人元祐中擢進士第徽宗即位應詔上書言十事乞誅大奸退小人進賢能開禁錮起老成擢忠鯁息邊事修文德廣言路容直諫宣和

二年知坊汾二州七年徙隆德府明年二月金兵至
知城中無備諭使降確乘城拒守力戰而死欽宗聞
之悲悼贈述古殿直學士

宋史本傳

种朴

世衡孫長安人

知河州蕃部叛朴出討時朴至州才二日

以賊鋒方銳且盛寒欲姑待之而胡宗回馳檄至六
七不得已遂出兵羌知朴來伏以待朴遇伏首尾不
相應朴殊死戰為賊所殺以馬負其屍去事聞贈朴

防禦使

宋史本傳

李翼麟州新秦人宣和末為代州西路都巡檢使屯崞縣金人取代執守將嗣本遣諭降翼射却之帥士卒堅守義勝軍統領崔忠殺都監張洪輔夜引金兵入城翼挺身搏戰達旦力不敵被執酋粘罕欲臣之怒

罵不屈死之

宋史本傳

朱昭字彥明府谷人宣和末為振武城兵馬監押攝知城事金兵內侵夏人乘虛攻之城壞不可復支昭退召諸校謂曰城且破妻子不可為賊污幸先戕我家

而背城死戰勝則東向圖大功不勝則暴骨境內大
丈夫一生之事畢矣衆未應昭幼子戲堦下遽起手
必之長子驚視又殺之徑領數卒屠其家人昇屍納
井中賊登城昭勒衆於通衢接戰自暮達旦屍填街
不可行昭躍馬從缺城出馬蹙墜塹賊驩曰得朱將
軍矣生致之昭瞋目仗劍無一敢前旋中矢死年四

十六

宋史
本傳

种師中字端儒

世衡孫
長安人

歷知邠州慶陽府金人內侵師

中援中山河間尼堪至太原師中抵壽陽之石坑為
金人所襲兵潰獨以麾下死戰身被四創力疾鬪死
師中老成持重為時名將諸軍自是氣奪其聞命即
行奮不顧身雖古忠臣不過也詔贈少師諡莊愍

宋史

本傳

楊綯

邦基父
華州人

宋末為易州州佐宗望伐宋蔡靖以燕山

降易州即日來附綯被殺

金史楊
邦基傳

吳革字義夫華州華陰人好學喜談兵以秉義郎幹辦

經畧司公事金人南牧使尼堪軍見之庭揖不拜責其貪利敗約詞直氣勁尼堪少屈為追回威勝諸屯兵授書使歸欽宗問割地與不割地利害對曰金人有吞噬之意願悉起關中士馬赴都為備詔以為閣門宣贊舍人持節諭陝西行至朱仙聞金人犯京師復還與張叔夜同入城請於帝乞幸秦州又乞出城劫之使不敢近又乞諸門同出兵牽制衝突尾襲應援可一戰而勝時衆言已入皆不果後金人攻安上

門填道度壕革言之守將使洩蔡河水以灌之不聽
及填道將合欲用前議則水已涸矣車駕幸金營革
以為墮其計往請叔夜欲身見其大酋計事叔夜問
其故曰茲行有三說一則天子還內二則金騎歸國
三則革死叔夜為言之不報上皇妃后太子出郊革
白孫傳乞留之不得乃與傅謀於啓聖僧院置賑濟
局募士民就食一日之間至萬計陰以軍法部勒久
之所合已至數萬多兩河驍悍之士既而有立張邦

昌之議革謀先誅范瓊輩以三月八日起兵謀既定
前期三日有班直甲士數百人排闥入言邦昌以七
日受冊請亟起事革乃披甲上馬至咸豐門四面皆
瓊黨給革入即執之脅以從逆革罵之極口引頸受
刃顏色不變其麾下百人皆死

宋史
本傳

劉化源耀州人紹聖元年進士建炎初金人陷關陝守
令以城降者金人因而命之化源時知隴州不肯降
城陷被執金人使人守之不得死遂驅入河北鬻蔬

果隱民間者十年終不屈有米璞者與化源同鄉里
登政和二年進士第時通判原州劉豫欲官之杜門
謝病卒不汙偽命有劉長孺者亦耀州人時簽事博
州判官廳公事與豫書備陳祖宗德澤勸以轉禍為
福豫怒囚之百日長孺終不屈豫後復官之不從紹
興九年宣諭使周聿上之朝詔赴行在簽書樞密院
事樓炤言璞苦風痺化源長孺老病遂命各轉兩官
奉祠又言新鳳翔教授陰暉守節不仕詔特改令入

官其後金復渝盟長孺之華陰縣不屈而死

宋史本傳

張吉

宗顏父延安人

為涇原將解宣威城圍死之

宋史張宗顏傳

李好義下邳人祖師忠州團練使父定一興州中軍統

制好義弱冠從軍善騎射為興州正將吳曦受金人

說以蜀叛亟歸與其兄對哭謀誅之密結親衛軍黃

術趙亮吳政等女弟夫楊君玉亦與知長史安丙與

楊巨源陰結忠義欲圖曦好義遂遣君玉報丙丙喜

曰非統制李定一之子乎此人來斷曦臂矣約二月

晦舉事好義夜享士麾衆受甲與好古好仁及子姓
拜決於家廟衆皆踴躍時偽宮門洞開好義大呼而
入曦露頂徒跣開寢戶欲遁遂斫其首出偽宮亟馳
告丙城中市不改肆好義請乘時取關外四州王喜
忌其能沮之好義曰西和乃腹心之地願得馬步千
人死士二百齎十日糧可濟丙從其請好義率衆攻
城親犯矢石人人樂死以少擊衆前無留敵金西和
節度使完顏欽奔遁好義整衆而入欲乘勝徑取秦

隴宣撫令謹守故疆不得侵越士氣皆沮好義以中

統制知西和州卒諡曰忠壯

宋史本傳

張珪字君玉鳳州人以戰功累官中軍都統制號虓將
寶祐末大兵圍合州珪與王堅協力守之景定初堅
入朝以馬千代四年乃以珪代千珪魁雄有謀善用
兵出奇設伏算無遺策其治合州士卒必練器械必
精御部曲有法故人人用命咸淳三年四月賽音迪
延齊提兵出合州城下珪碇舟斷江中為水城大兵

數萬攻之不克遂引去德祐元年陞四川制置副使
知重慶府二年十二月珏入重慶至元十五年二月
珏率兵出戰兵大潰歸索鵠飲左右匿鵠乃以小舟
載妻子東走涪中道大憾斧其舟欲自沈舟人奪斧
擲江中珏踴躍欲赴水家人挽持不得死明日鐵木
兒追及於涪執送京師珏至安西趙老庵解弓絃自

經廁中

宋史
本傳

金

楊達夫字晉卿耀州三原人泰和三年進士會有詔徙民東入關達夫與衆行及韶避兵於州北之橫嶺為遊騎所執將褫衣害之達夫挺然直立馬首畧無所懼稍侵辱之即大言曰我金國臣子既為汝所執不過一死忍裸袒以贖天日耶遂見殺

金史本傳

完顏陳和尚名彛字良佐豐州人父乞哥同知階州軍事戰歿於嘉陵江陳和尚試補護衛轉忠孝軍提控正大五年北兵入大昌原合達問誰可為前鋒者陳

和尚擐甲上馬不反顧是日以四百騎破八千衆奏
功第一授定遠大將軍六年有衛州之勝八年有倒
回谷之勝九年三峯山之敗走鈞州城破陳和尚趨
避隱處殺掠稍定乃出自言曰我金國大將欲見白
事詣行帳前曰我忠孝軍總領陳和尚也我死亂軍
中人謂我負國家今日明白死天下必有知我者時
欲其降斫足脛折不為屈割口吻至耳嚙血而呼至
死不絕大將酹以馬漣祝曰好男子他日再生當令

我得之時年四十一

金史
本傳

劉興哥楊沃衍部將率兵往來邠隴間屢戰屢勝故大軍猝不能東下興哥鳳翔虢縣人起於羣盜人呼曰熱劉後於清化戰死大兵至酹酒以弔西州耆老語之至為泣下

金史
本傳

元

董成夫奉元人以軍功授察罕諾爾宣慰使敵兵入邊

歿於王事贈中大夫樞密院副使諡忠烈

賈志

明

王真咸寧人洪武中以功授燕山右護衛百戶從靖難出奇制勝肥河之戰斬獲無算而後隊不繼被圍數

匝真氣愈奮斬敵數十人馬上自刎而斃

續文獻通考

高翔朝邑人洪武中以明經徵為監察御史所論奏皆國家機要多被采納建文時尤戮力戎事相與激發忠義初翔與程濟並徵翔勵名節濟好術數翔止濟勿為此不聽已而有兵事濟又勸翔學其術翔曰我

願為忠臣也金川門破翔招濟同死濟曰我願為智
士文皇素聞翔名即位後召之翔持喪服入見大哭
語不遜乃命殺之沒產夷族諸給高氏產者皆加稅
曰令世世罵翔也親戚悉戍邊又發其先墓雜犬馬
骨焚灰揚之而以其地為漏澤園

世法錄

韓永陝西西安人或曰浮山人豐軀美髯音吐宏朗官

戶科給事中慷慨論兵建文喜之靖難後杜門不出

召入見不屈死

續藏書

趙義商州人洪武中進士任中軍都督府經歷死於靖

難親族為盡今其地名為趙峪

賈志

程濟朝邑人以明經為岳池教諭去家數千里濟夜歸朝邑朝講岳池人咸異之建文初熒惑守心濟上言明年某月某日兵當從西北方起帝曰安得此不祥語將誅之濟請囚而觀之明年燕果起兵帝出濟獄中以為翰林院編修使克軍師護軍小河之戰南軍大捷諸將樹碑露功誇列姓名濟固辭不得夜自襁

碑下鐫之及靈壁之戰南軍大敗成祖過軍碑下大怒命鐫滅之遽使止曰錄其姓名來乃如碑按治濟名獨以先鐫脫及金川門破濟自髡從建文君亡屢免之於阬其後建文君出滇濟嘗從行已莫知其所

終

名山藏

趙天泰三原人建文元年以明經為翰林編修出亡之日天泰與焉時衣葛因自稱衣葛翁又號為天胄子

後老死於蜀

表忠紀

王志咸寧人永樂初進士授吏科給事中陞河南知府

四年草寇猝發死之勅旌忠臣

表忠紀

高士文咸陽人官燕山左護衛百戶從靖難有功累陞

前軍都督僉事為人質直剛果善騎射其征交趾多

効勞勩勩賊至廣源州沒於陣人皆惜之

名山藏

路俊字文英富平人官錦衣衛百戶英宗北征俊扈從

土木敗績俊潰圍而出號召軍將軍將莫應又擊虜

營未至行在力竭遇害天順間諡昭信子誠世襲錦

衣衛百戶

富平志

王尚文商州人正統中舉進士授戶部主事土木之變

沒於沙漠

賈志

霍瑄字大宗鳳翔人永樂中舉人授山西大同通判陞

知府正統十四年英宗土木之變守城者戒嚴不敢

啓瑄感慨奮不顧身從水竇匍匐出親叩馬嗚咽進

膳羞靴袍

賈志

姜漢字大容榆林人由指揮歷總兵鎮寧夏正德五年

寘鐸之變其黨何錦周昂丁廣等謀置酒王宮伏兵召鎮巡官挾之使叛漢至寘鐸以微言挑漢漢責以大義寘鐸知不可奪伏兵起執之漢罵不絕口遂遇害事聞賜祭葬加子奭官指揮使後鎮甘州數立邊功能世其家部將有李秦者綏德衛千戶於寧夏花

馬池石溝堡戰死

延安府志

殷輔西安前衛指揮僉事正德七年調征四川與賊廖麻子戰於德陽死之時有遊擊姚震榆林人亦征蜀

寇戰歿

賈志

馮禎綏德衛指揮歷榆林副總兵正德七年流賊猖獗

禎奉命討之連戰皆捷及洛兵半渡賊悉衆薄之戰

死事聞贈洛南伯建祠於河南府

延綏鎮志

蔣賢榆林人以監生任靈璧縣主簿有清謹名時流賊

犯鳳陽賢以靈璧去皇陵不遠繕城隍修戰具選民

丁以備之賊至賢禦之郭外力不敵衆潰城遂陷賢

短兵巷戰賊趣降賢曰榆林忠孝地我有死而已遂

為亂兵所殺事聞賜祭奠於靈壁妻謝氏守節十數

年以饑死無嗣

延綏鎮志

邵璋西安後衛人正德中舉人任登州府通判流賊犯

境璋率衆力戰死之

賈志

霍宗鄆州人正德十四年回賊作亂掠州境兵備道甯

溥遣指揮率戍卒及民兵捕之至石梯山賊勢猖獗

衆潰走宗以鄉兵獨當一面力不能支死於難

鄆州志

張澍渭南監生正德末任江西按察使知事宸濠反械

繫之驅令督舟投水死

渭南縣志

郭江榆林衛指揮歷固原總兵官戰於定邊死之賜葬

祭建憫忠祠蔭一子指揮世襲是時有綏德衛指揮

孟仁中軍指揮賀節者以力戰死於定邊又有龍州

把總延安任傑者臨陣見殺

綏德鎮志

張鳳榆林衛指揮大同弘寺堡參將以罪謫戍嘉靖中

總督翟鵬題起廢官立功贖罪鳳赴焉戰於鵲鴿峪

全軍覆歿詔復官建祠蔭次子正千戶是時死事者

又有把總宗良臣戰歿於永興之頁沙梁良臣威武堡人又榆林衛指揮王璋延綏衛指揮僉事史畧指揮孫世傑皆戰死於宣府

延綏鎮志

趙天福延綏奇兵營軍也嘉靖二十四年隨副總兵李琦被圍於靖邊指揮崔經力戰矢石如雨天福以身翼蔽經得免三十三年副總兵李梅雙山之戰天福從管司賈琛先登軍敗琛與天福同戰死

延綏鎮志

武城榆林人正德間武舉與千戶李江管本鎮司事嘉

靖初禦敵於紅山兒敵衆兵寡力戰而歿

延綏鎮志

高儒綏德衛百戶嘉靖中隨遊擊梁震拒敵於棗茨梁死之又有宋銳者榆林衛百戶嘉靖中隨副總兵白

爵戰歿於高家堡之馬鞍山

延綏鎮志

王勲渭南人襲祖職為延安衛百戶驍勇多智所向克捷歷陞寧夏副總兵嘉靖中邊境不靖勲率師出戰於鹿泉敵大至勲據險發矢力戰移時矢盡而殞世

宗錄其忠詔立祠子以寧襲指揮使

渭南志

孫贛綏德衛指揮為薊鎮總兵嘉靖中勤王戰死傳楫

傅潛子萬厯中陣亡

延綏
鎮志

馮恩榆林千戶厯官指揮僉事嘉靖中由延綏遊擊陞

大同參將前守將遇警多不出恩至力戰死之贈右

軍都督府都督諡壯愍蔭子時泰指揮僉事世襲又

千戶姬曉亦死於大同

延綏
鎮志

杜松號鶴林榆林人少負胆決精騎射軍中目為飛將

萬厯間火落赤糾套騎吉能屢為邊患松從總兵官

麻貴為前鋒屢破走之積功至坐營中軍二十三年
領兵出常樂塞先登陷陣論功最進實授參將繼敗
火落赤於安定又敗鐵雷於磚井威名日起請告歸
松在軍與士卒同甘苦紀律甚嚴又驍果善戰松去
邊四年督撫以邊事急交薦之詔起原官協守延綏
東路炒忽擁眾寇孤山之紅崖堡松率精騎直前搏
之斬其部長十二奪駝馬鎧仗無算進都督僉事掛
征西將軍印專守延綏三十四年大敗火落赤於安

邊塞吉能邀王封不得大舉寇邊又勾東西部入犯
松分馳應禦諸部皆退走多棄其所掠人畜輜重去
西陲倚為保障復告歸四十六年

王師破撫順鐵嶺中外大震言官爭薦以原官起駐瀋
陽破家募士及蒼頭廬兒得數千人疾馳出關四十
七年春經畧楊鎬分四路出兵松一軍出南路經畧
原期三月朔進兵松自負夙將先二日三鼓嚴裝出
撫順

王師聞松先出亟簡精銳三萬騎悉力禦之松越五嶺
渡渾河已半渡忽萬騎遮擊軍衝為二車營鎗砲在
後水急不能即渡林間伏四起自午至酉血戰力竭
全師殲焉松碎首淪沒寸骨不存

續表
忠記

袁應泰鳳翔人由永平道陞遼撫適熊廷弼被論代為
經畧辛酉二月

王師渡渾河臨遼城至三月二十三日城破經畧登樓
拜疏佩印劍自裁內姪姚居秀從之僕唐世明撫屍

大慟焚樓而死

續表
忠記

段展涇陽舉人歷自在州知州轉餉出關駐瀋陽時日
暈異常展移牒經畧言天象示警宜預飭邊防踰月
而瀋陽城破展死之

續表
忠記

姬文肩字士昌華州人萬曆癸卯舉人謁選滕縣知縣
莅任三日白蓮賊攻滕縣時滕民什九從賊公徒步
叫號登陴才數十人問民何以從賊則曰禍由董二
董二者延綏巡撫某子也公登城呼賊曰若等以董

二故挺而走險吾執董二治其罪以伸若冤若等復
為良民可乎公長身赤面髭髯奮張乘墉大呼聲殷
殷動樓櫓賊望見以為神人謹呼羅拜俄而箭發於
西隅二賊斃焉視之則延綏沙柳幹也賊憤盈肉薄
而上遂不可禦公緋衣坐堂上嚼齒罵賊賊前搏公
裂其冠裳以銀鐺鎖之公大罵胡不速殺我越三日
為詩八章書於屋壁以印狀授門役魏顯炤家僮守
務北向再拜自縊而死遂葬於官署之池側賊考掠

顯炤索印顯炤及守務罵賊死之詔拜錄顯炤守務

復其家

墓志

楊愈懋潼關衛人萬厯末為中軍都督天啓癸亥蜀奢
寇亂命愈懋總鎮四川獲捷功者五急欲進掃其巢
遂率師至江門候援兵不至愈懋曰事不可為矣乃
以勅印齎巡撫望闕遙拜曰此戰犂庭社稷之福苟
或失利以死從之決計深入竟遇害妾王氏聞訃絕
粒死

潼關志 按奢崇明亂蜀是天啓中事愈懋盡節必在此時潼關志作余酉當是奢余音近相

訛耳

牛彩南鄭人以明經為成都教授多士奉為師表為奢

賊所執不屈被殺

漢中府志

鄭國昌字天符邠州人萬厯丁未進士任永平兵備道

已已

王師下永平有勸出亡者國昌厲叱之先令妻子縊死

乃從容自盡事聞追贈太僕寺卿從祀表忠祠

畿輔通志

子奉先以蔭歷衡州府同知亦殉難

邠州志

党還醇字子真三原人天啓乙丑進士為良鄉令有聲
已巳城破死之妾勝友僕死者一十二人事聞贈光

祿寺丞

賈志

高運馨神木人崇禎初王嘉胤倡亂運馨被掠拷索財
帛因極罵投河死時賊入貢生蘇萬元室萬元瞪目
罵不已賊怒斫之又有秦光祖李亨俱涇陽人仗義
討賊俱力竭而死

賈志

薛永譽吳堡人歲貢崇禎三年賊大起七月犯吳堡乏

川口永譽先奉母居城中身率衆守虎頭二寨攻圍
既久永譽知力不支盡趣寨中老弱渡河永譽自斷
後以禦賊賊衆蝟集矢石如雨遂入河中死又安定

王俊彥字升庸素重氣節寇陷城閤室自縊

賈志

秦三輔字陸海萬厯戊午舉人令新城值吳橋兵變直
攻新城三輔率衆守陴身被七創而死

三原縣志

方振寰字斗華城固人崇禎丁卯舉人任山東福山知

縣城破死之

賈志

梁體坤字寧字臨潼人增廣生崇禎五年流賊縱掠其地令牽馬坤大罵曰我朝廷士子豈為賊驅使耶賊舉刃斷其四肢遂殺之

臨潼志

楊呈秀字實甫華陰人登萬曆庚戌進士歷官順慶知府後罷官家居會流寇侵掠慨然結鄉勇以為保固得數千人每戰獲捷崇禎七年賊衆大至迎戰於縣西二十里不勝或勸之退避叱曰丈夫受國恩臨難當致死豈可縮首苟生遂奮呼當先力竭被執賊怒

甚遂磔殺之直指傳永淳以聞贈光祿寺少卿賜祭
葬弟呈芳字泗源性篤孝友兄呈秀禦賊被執呈芳
泣曰兄亡弟豈獨存遂單騎直入賊營橫戰至暮身
帶重傷猶斬賊數十人及項將斷呼兄之聲不絕直
指并以聞建坊旌表

華陰志

張應昌字順之榆林人初為延綏副總兵崇禎四年正
月賊神一元陷保安應昌擊敗之三月賊圍慶陽應
昌援之賊解去降賊不沾泥擁衆脇糧賞攻米脂洪

承疇與應昌往討賊分兩營以待連戰賊始遁至西
川斬三百餘級賊溺死無算六月郿州賊混天猴張
孟金謀襲靖邊應昌邀之於真水川敗之追斬四百
餘級神一元死第一魁領其衆降尋叛去其黨黃友
才斬之來歸旣而友才復叛至是為應昌所誅以功
陞寧武總兵官加都督同知紫金梁諸賊破臨縣山
西震動六年二月許鼎臣曹文詔屯平定應昌屯汾
州往來太原以禦寇七月賊攻彰德應昌進勦賊汾

陽九月敗賊於平山獲賊首張有義即一盞燈也七年四月川賊三萬屯鄖陽之黃龍灘應昌與戰於均

州敗績死之

延安府志

張景耀字振兮蓋屋廩生時流氛四煽景耀以禦寇保鄉閭自任知縣田時暢令主義兵訓練嚴肅崇禎七年七月賊鑽天鷄等循山而至景耀遏之西境乘勝追至謝家灘會天大雨衆潰為賊所獲支解之又同邑諸生雷一聲里民翟羽翽與叔翟三皆率鄉兵禦

賊衆潰而死

蓋屋志

黎屏極鳳縣武生崇禎七年流寇破城屏極挺身巷戰

自辰至午以刀折見殺

漢中府志

薛國蕙華州人以寧夏守備家居弟國華郡諸生崇禎七年八月流寇千人盤踞西南石脆山峪肆行屠掠國蕙及國華欲奮身搏戰苦無兵適御史傅永淳入關抵華阻寇聞其事呼至面諭勦賊遇賊於峪口之柿村同義勇姬文啓羅國楨史曰環王紹禹馬任等

十八人喋血大戰俱陷陣而歿賊死甚衆即夕遁

賈志

徐應龍應鰲華州人應龍為山東鄒縣典史應鰲為四

川雅州吏目崇禎七年流寇刼掠俱被虜不屈死時

同郡諸生范祖淹壽官徐邦瑞皆罵賊死

華州志

韓識武功人儒生崇禎甲戌守堡禦賊堡已陷猶持梃

當門傷數賊賊壯之不欲殺識大罵不已竟磔死

賈志

王祚丕字念茲涇陽人崇禎甲戌流寇入境祚丕奮率

鄉勇戰於王六十橋手刃數賊為流矢所中而歿

涇陽

志

屈學曾鳳翔縣諸生崇禎中流寇大起當事檄屬邑各練鄉勇為守禦計學曾身承其事八年春賊趨鳳翔

學曾督衆力戰陷陣死

涇陽志

張全昌字濶之應昌弟以父蔭歷官靈州參將崇禎四年延安賊趙四兒以萬餘人掠韓城郃陽全昌以五百人戰三日斬三百餘級賊走鄜州復擊斬六百餘級趙四兒尋降陞宣府總兵官七年二月河南賊自

鄖陽渡河入郢陷房縣全昌連敗之七月賊混世王等從鳳翔東奔將犯西安洪承疇檄諸路兵合擊又恐賊東出潼關先令曹變蛟同全昌間道走渭華遏其前而自率兵至潼關紅鄉溝追賊賊卻承疇馳赴藍田欲從山後間道勦之賊夜走商洛八年五月全昌自咸陽出興平之東距老狗狃營五十里賊渡河走郿縣官兵追至秦王嶺值寇大至全昌擊敗之自是商洛之寇逃終南山中餘寇西奔興平遂祈降陰

遣諸賊連營走潼關守將艾萬年等兵潰全昌亦沒
於陣子福壽武舉任宣府深井堡守備亦以勇力聞

賈志

王廷賓字觀光澄城人崇禎戊辰進士任鄆陵令調永
城以治行卓異與考選旋丁艱歸里八年秋賊混天
星破城被執不屈而死

澄城志

梁民養韓城諸生崇禎八年寇至民養攜家入砦自保
寇攻急度不能全泣跪母衛氏前母自裁呼妻女至

手办之三子皆遣去遂自經死

韓城志

張國禎字蓋翼臨潼人從兄給諫國祥講實踐之學一夕賊數十刼其父國禎即持梃赴之免父於厄人稱其孝崇禎乙亥流賊薄城率族人避去夜深雨雪曰不可獨全吾家於是率僕人遍至隣家令亟起避難黎明賊突至率衆禦之手刃數賊相持至未力疲被執不屈遂遇害

賈志

杜必殿字賓皇世居咸陽北杜鎮崇禎乙亥賊薄邑必

殿倡義堅守援兵不至城遂陷被執賊有渠魁奇其
貌露刃逼降必殿不屈指賊罵曰若獨非朝廷赤子
何竟反耶賊怒甚遂遇害

鶴雪
堂集

俞翀霄靖邊人任延綏總兵崇禎九年闖賊擁兵北至
時翀霄蒞任甫月餘倉卒率兵五千拒之於西川土
壑若遇賊力戰自辰至酉殺獲甚衆援兵不至遂死

馬

延綏
志

鄭國禎延長人以選貢授歸德府通判尋告歸崇禎十

年六月流寇陷城子諸生鳴世欲奉之逃國禎曰城
亡吾安所逃乎遂自刎死鳴世見父死義不與賊俱
生奮刀出門殺賊力盡被執賊過天星壯其貌欲釋
之鳴世仰天大呼曰父死吾何生為罵不絕口賊殺
之同邑張程思貢生授南陽府經歷終養家居城陷
以大義諭賊賊怒殺之

賈志

苟好善字若誠醴泉人天啓乙丑進士歷長治蘭陽令
有惠政擢御史建言忤旨出知濟南府戊寅

王師南下好善分守北城城陷死之贈太僕寺卿子鶴齡字子和聞父死徒跣走數千里遍覓遺骸出於壕下始扶櫬歸葬時兵火倉皇幼弟延齡壽齡俱相失鶴齡間關求訪復得完聚蓋孝友兼至云同時又有荏平令黃建極文安令王鑰俱武功人武邑令鄭集命延長人鉅鹿令郭司南安塞人任邱令白元慧清澗人皆城破力竭而死白妻某氏郭僕張爾璋同死

焉賈志

劉光祚字鴻基榆林人積功至保定提督三關總兵以河南賊盛督師楊嗣昌調援勦過南陽唐藩留守郡城值李自成兵數十萬來攻光祚血戰七晝夜力盡

而歿

延安府志

劉國能之守葉也力戰不能支城陷自成念國能幼同里習嬉戲稍長同學拳武又同起草澤有意欲生之乃好語國能曰若我故人也何不服國能唾而罵曰我初與若同反今則王臣也奈何從賊遂遇害

續表忠記

豫撫常道立招撫射塌天等射塌天本名劉國能性至孝就撫乃奉其母命也庚辰六月左良玉遣國能圍張獻忠於瑪瑙山獻忠食盡分兵四出抄糧不得糧歸者盡殺之未歸者詣降左良玉使國能將之首行詐稱糧至獻忠開營延入國能掃其營壘擒其妻孥與徐以顯潘獨鰲等送襄陽獄自成破葉縣國能守葉自刎死其妻先死子方八歲自成入城抱置膝上欲收養之不從自解所帶小刀亦刎死

明季遺聞
按續表

忠記國能附汪喬年傳盡節在十四年明季遺聞作庚辰年事不合

武大烈臨潼舉人強敏有幹濟時令永寧寇掠境上數卻之至是獄囚勾賊來攻城守都司宵遁大烈固守三日賊夜半登城執大烈自成以同鄉故欲活之大烈不屈索印又不予乃燔灼以死

續表忠記

盛以恒潼關衛人崇禎十年冬來知商城縣事雖儒者而秦人素習金革甫蒞任寇猝來犯以恒登陴設守以兵法部勒邑中子弟賊攻城不能克乃解去嗣後

不復來犯邑賴以安及獻忠陷襄陽勢益張以恒已
遷開封府同知士民以其前此禦寇有方畧城得無
陷羣起攀留以恒因士民歸誠於已遂慨然任城守
事十四年二月賊大隊雲集以恒堵禦甚力雨雪大
作守陴者寒凍不能支以恒猶擐甲執弓督家衆射
賊賊益併力合攻流矢中以恒右額猶裹創拒敵敗
留餘黨綴以恒而別揀驍悍緣北城而登遂陷以恒
率家衆巷戰良久殲賊甚多家衆亦盡於賊乃被縛

大罵不屈為賊所支解其孫覺亦不屈死事聞贈副

使
續表
忠記

葛竹溪淳化諸生善射崇禎十四年流寇滿天星過縣
恣行剽掠竹溪不勝忿急挽弓挾矢而往射賊殺十
餘騎須臾矢盡弦絕賊衆大至遂遇害於寺坡崖下

柴菴
疏集

猛如虎虎大威俱邊外人家榆林如虎歷總兵官鎮守
南陽屢卻賊及圍城將陷持短兵巷戰手及袍袖有

血數升過唐府北門叩頭謝自稱力竭為賊所殺大

威為楊文岳大將鎮守汝寧攻土賊中礮而死

延綏鎮志

李賢中部歲貢任汝寧教諭以老歸崇禎十四年寇陷

中部執賢欲加笞辱賢張目大罵延頸向賊賊竟殺

之子諸生芬字慟父死歷白當道得祀鄉賢

賈志

艾毓初字孩如米脂人崇禎辛未進士知內鄉縣毓初

生長邊陲知兵習戰六年冬流賊來犯毓初令埋大

砲滾地龍於城外城內暗通火線故於埋砲處備禦

單疎示賊以瑕賊果爭馳之燃線而炮發賊死無算
乃解去歷陞至參議分守南陽自成用宋獻策計復
來犯楊文岳援軍至即引退甫退又復嘯聚使援者
疲於奔命城遂潰毓初登城樓自縊

續表
忠記

杜邦舉富平人任鄆陵典史崇禎十四年十二月城破
被執自成知其素得民心欲降之大罵曰朝廷臣子
豈為賊用自成怒抉其舌邦舉嚙血噴之仍大罵遂

遇害

續表
忠記

馬嗣杰字孟善同州人官戶部主事管薊鎮糧儲壬午年死難母薛氏弟嗣杰與焉又嗣杰從兄嗣煜官濟南府通判城破亦以身殉

賈志

党威字振玉神木人以西安參將有戰功見重於經畧丁啓睿崇禎十五年督師汪喬年統兵二十萬勦闖賊威以中軍副將進秩總兵同四總兵十副將當闖賊八十萬衆環戰十七陣互為勝負及賊勢日衆汪督駐襄縣為戰守之計威與曹文詔以萬餘兵護汪

督據孤城城中乏食威見勢不可支乃進謀督師曰
不如暫退關中休養一年簡勁兵以殄渠魁餘黨不
足平也汪不可及賊圍城下汪知事去欲自盡威泣
勸乃止旋登城見賊帥旗在南威引精銳二十騎出
西門直抵賊帳適賊帥他逸斬左右數人奪帥旗而
還次日復率千餘騎出東入南出西入北衝突賊營
當者無不披靡及城陷汪自經威復馳驟數創失馬
自刎而屍不仆者移時賊帥為具棺函瘞之賈志是時

副總兵樊來保及神木副總兵艾萬年與李賊戰于

巴家寨死之

延綏
鎮志

吉孔嘉洋縣舉人累擢順德知府壬午

王師臨城孔嘉力屈與妻張氏長子貢生惠迪次子婦

王氏並死焉

續表
忠記

李盛英榆林人以明經任太湖縣流賊構難圍城盛英

竭力拒守援絕城陷被執賊欲降之盛英不從罵賊

撞樹而死其妻亦完節

賈志

劉其德字子上興安州人寄籍紫陽崇禎戊辰進士由

庶常歷官諭德在史館有聲尋目盲乞骸歸僑寓襄

陽闖賊破襄陽其德罵賊而死

興安州志 按省志云其德歸守興安興

安志云死於襄陽中間事蹟不無抵牾存疑可也

馬颺字電如陝西同官貢士崇禎十五年任沔陽州同

知賊陷承天督兵堵賊賊繞出颺背颺馳介馬疾呼

所向披靡賊至愈衆下馬奮呼家丁數人背城與賊

戰猶射殺數十賊矢盡力竭被執不屈賊怒用勁梃

通中而死藁葬城東二十一載子來沔啓殯易棺顏

色如生

湖廣志

李振聲米脂人進士巡按湖廣王璣扶風人舉人承天知府崇禎壬午除夕賊破承天並以不屈遇害振聲被執自成以同姓同邑稱之為兄且贈以金幣振聲不屈賊數置酒邀飲醉即厲詞詆斥乃移之襄陽令部將劉體仁伺察之及孫傳庭出關討賊復移之裕州有言振聲通書傳庭者賊怒遣其將谷永殺之南

門外時九月二十九日也先是振聲被執有傳其降賊者朝野共詆之後賊入山西榜列受職者姓名以誑遠近振聲與焉實未受職也

續表忠記

璣字玉溫知承

天府時築關守城勤事如家既報陞鳳陽副使忽流寇大至攻城璣極力禦之降兵內潰璣憤甚執刃轉戰被執罵不絕口賊百計脅降不從怒令殺之璣望闕再拜延頸受刃時崇禎癸未正月也楚人義之收

屍殯殮子鍼鎬扶喪歸葬

賈志

孫璜字用謙三原人由歲薦任鹽山教諭癸未鹽山城將陷左右促璜與令同出走璜曰臨難苟免何以為

臣已而城破璜自縊

三原志

范如游邵陽人崇禎癸酉舉人性明敏有執持後知武定州死於難

邵陽志

邵公坤廩生公巽公佐監生公齊公量生員俱商州人羣從聚居夙敦友愛閨門雍睦無間言癸未七月州城陷賊將袁宗第巡遊至邵氏逼降之公坤兄弟五

人同聲罵賊不少屈脅以刃罵益厲賊盡殺之公坤之胞姪紹祖徽祖遵祖緒祖嗣祖公佐子昭祖公量子光祖弘祖式祖爭衛父兄難長者制梃幼者投瓦礫俱遇害賊入中閫公坤之寡嫂公乾妻張氏痛五子無一存赴井死公佐妻孔氏公異妻劉氏俱投繯死公坤之胞妹適雒南薛匡倫歸省其兄最後遇賊賊俾執爨氏厲聲罵賊賊愈怒礫裂之邵氏一門男婦死難共一十八人亂定合塋安葬一時稱奇節云

賈志

張任字碧岑三水人萬厯間舉人歷官衡州守未幾寇

至任率衆督戰舟中力屈死之舉家咸盡節焉

賈志

劉裡字誠若中部人舉人性剛介識大節事父極孝賊陷邑城裡負父走時秋雨河漲渡者多溺裡獨弗溺辛巳授登封知縣時大盜李際遇申靖邦盤據山砦裡設法守禦與士卒同甘苦練死士數百且戰且守賊不敢近癸未逆闖攻登封城陷被執自成欲降之

裡掉鬚罵曰豈有七世清白吏而降賊耶自成從容
言曰吾與公誼切桑梓今方有事關中當同載西歸
裡神色愈厲曰吾願血沾登土自成義之次日復令
賊將劉崇文說之反覆數百言終不屈遂遇害於泮
水之側事聞贈按察司僉事先是登封不守父爾完
泣曰吾子素剛烈死國事矣及聞訃顧坦然曰殺身
成仁又何憾焉

賈志

趙希魁渭南人由武進士官參將從孫傳庭戰歿於河

南渭南

志

盛昶之字璽振潼關衛指揮使總制孫傳庭與寇自成
戰郾縣敗績自成乘勝抵關勢若山裂人無固志城
遂陷昶獨堅立不動日暮被擄明日賊促諸將西強
昶之行不從厲聲罵曰我固盛指揮也世受國厚恩
有死而已恨不手刃諸賊奴豈有職官從賊者哉賊
怒縊殺之又衛指揮使張爾猷字定遠潼關陷率家
僮奮馬馳突遇賊南門矢發輒應手仆復揮刀斬其

數騎賊相顧失色俄頃賊大至環攻之矢下如雨爾
猷大呼曰我前掌印指揮張爾猷也賊爭前刺之身
被數十創既墜馬猶罵不絕聲而死時本衛指揮使
李繼祖守東城本衛千戶袁化龍守西城賊入各就
所守汎地死之

賈志

郭宗振字引震華州人萬厯癸卯舉人初授河陽令河
陽地當衝道官商絡繹供億維艱宗振至力革之調
太邱時有貴公子奪人田逼婦自刎宗振竟置以法

境多盜宗振懸金以購盜賊遂息轉壽春守境內奸
宄作亂者聞宗振至悉散去郡北多水患民皆逃亡
宗振捐俸招集歸者六十餘家人名之曰郭公集郡
地多荒磧宗振給牛種寬賦稅漸次開墾遂成良田
丁內艱補右丞遷比部郎檢驗吏牘謹敬罔懈有言
官陳贖軍之奏宗振抗疏力爭朝論是之丙子銜命
恤蜀有納賄縱賊並開釋重案者宗振悉寘於理後
旋里崇禎癸未殉難

華州志

陳嗣虞字述敬華陰人萬厯庚子舉人仕至高郵知州性沈靜廉潔一介不苟歸里後杜門讀書不妄交遊闖賊陷省偽檄依例輸餉嗣虞內懷悲憤而不形於色乘家人不意步至渭濱投水而死

賈志

東肇商字雲駒華州人諸生性敏而多學詩文千言立就聞賊至人皆逃避肇商獨飲酒不輟挺刃而出大

罵賊奴遂被害

賈志

焦源清號湛一由進士厯官至宣府巡撫年七十始舉

一子賊入西安勒源清往見不屈自經弟源溥號涵
一以進士由知縣入為御史歷撫大同未一年罷歸
癸未冬闖賊入西安召諸邑搢紳受偽職源溥為賊
黨所刼執見自成授以總督銜源溥大罵曰爾為賊
乃欲污我自成閉諸空室罵益烈鬚髯皆上指背皆
裂賊稍近舉手擊之復厲罵不輟賊拔其舌支解之
同死者渭南吏部尚書南企仲號弦蒲進士起家年
八十三矣罵賊不屈曰老臣何惜此餘年報國不食

死子進士禮部郎居業不屈死從子居益由進士歷官至福建巡撫海外有紅毛夷者俗殷富國名賀蘭自昔不通中土奸民潘秀賈大泥始引其人據澎湖求市遂入犯內地濱海大擾及居益履任設方畧討平之天啓五年遷督河道晉工部侍郎時逆奄竊柄奄黨迎合逆意劾居益依傍門戶削籍去福建士民詣闕留之不聽乃立祠以祀豎碑於彭湖平遠諸山紀其績焉崇禎元年起督倉場時陝西四鎮缺餉至

三十餘月貧卒蠶起為盜居益為鄉土憂疏請以陝
賦當輸關門者留三十萬紆其急報可代張鳳翔為
工部尚書以疏救曹郎帝怒其徇私再削籍後叙守
城功乃復冠帶城破自成誘降不屈罵賊被炮烙而
死

續表
忠記

鄭君愛字錫吾渭南人選貢授鄖陽府推官以憂歸復
補衡州府皆有聲事父極孝值李自成陷渭南堅持
大節不應偽命遂不食死

渭南
志

王佩珂臨潼人事親色養備至明末司鐸河南商邱歸里後值李賊肆橫預戒子孫潔身蹈義勿致玷污癸未冬賊入關中堅臥不起水米不入口旬餘而卒其

子及孫賊迫脅以偽官皆遵訓守義不為賊屈

臨潼志

白昭遠字允哲臨潼監生崇禎癸未闖賊圍堡堡破昭遠大呼城頭曰城破矣節義為重婦女各宜入井一

時婦女死節者甚衆賊怒殺之

臨潼志

陶爾德字太初咸寧人進士仕至川北道告歸李賊攻

長安爾德分守東城賊至被刃死

咸寧志

崔爾達字汝明西安右衛指揮擢秦州守備秦藩稔其
賢疏留之癸未逆闖圍會城爾達擐甲侍衛昕夕不
懈城陷衛士皆竄爾達獨以短兵接戰賊衆大集爾
達奮呼殺賊手刃數人賊怒環攻之遂死五日得屍

顏色如生

咸寧志

李光信咸寧學生崇禎癸未賊圍城光信晝夜守禦城
已陷猶持斧與賊戰賊怒以刀斫其頸死又諸生王

召俊亦投井死

賈志

朱誼果秦藩宗室也字明遠丙子鄉薦聞變投井死秦府舍人不知姓名王被執舍人牽賊而罵遂死亦袁

憲一流也

學古堂集

徐應魁秦藩右護衛旗官王愛其才敏每奏事京師取辦江南皆特任之應魁忠摯自矢癸未城陷應魁從

王嗣及王嗣為賊所劫應魁絕粒七日而死

賈志

祝萬齡長安人少受學於馮恭定歷官至副使賊陷省

會萬齡衣冠入關中書院拜先師畢自縊於側御史

霍達表聞於朝蒙詔褒異

學古堂集

竇光儀長安貢生任懷慶府通判崇禎末歸里闖逆陷
會城光儀衣冠東向拜遂赴井死又徐方敬者萬厯
時舉於鄉授儀封知縣既歸里值會城破不欲辱賊
手遂正衣冠赴井死

賈志

孫孕芳字嗣香世居西安之咸寧與兄孕泰讀書慈恩
以節義為已任壬午孕芳舉於鄉孕泰拔貢士賊入

城孕芳自經孕泰尋父不見亦投井死

學古堂集

周培忠咸寧人以興平縣貢生任隰州知州謝政歸會李賊陷西安一門盡節者數十人又咸寧朱恩同弟

斗環姪浯俱義不從賊投井死

賈志

丘從周都司吏也長不滿三尺彊直敢言西安陷見自成暴虐乘醉直至其前戟手罵曰若一貧賤細民今

妄踞王府將僭偽號逆天背理所為如此吾見汝屍之萬段也自成大怒立砍殺之

續表忠記
賈志作丘東周

雷堂商州廩生崇禎十六年十月十五日李自成陷商州謂家人曰我自有死所乃衣冠出至博文齋自經死李本健亦廩生城破逃北山被執慮不得死所紿賊曰我有藏金盍至家比至急投入井賊誘使出乃大罵以石擊之罵愈甚賊以土石填其井又庠生李本深城破服衰麻與子合娃守父柩而哭賊至並子俱被殺庠生呂元聲城破與母妻誓同死母妻曰汝盍逃乎元聲堅不去死之又生員孔纘文城破被賊

執大罵不止賊煎油灌之立死賊退收其屍油尚透腹又楊名道役也被賊掠罵不絕口乃縛置樹上罵益厲割其舌磔之州民周揚實工烏鎗賊攻城三晝夜揚實傷賊甚衆賊識之城破執而磔之焚其骸

商州志

李喬崑字孕厚高陵人天啓乙丑進士筮仕洪洞洪洞故多李氏喬崑之遠祖在焉有持家譜干以私者謝卻之擢守真定中官欲加以屬禮杜門不屈人稱其

節闖寇據關汚以偽司馬拒弗受望闕北拜而死

賈志

王徵號葵心涇陽人由進士除廣平推官白蓮獄起株連者數千人徵咸理出之濬清河水閘溉田至千頃母憂去補任揚州三王之國護從者多所誅求徵白王禁戢民以無擾天啓中徽州富民吳養春與弟養澤爭產弟赴東廠首其兄佔黃山獲利無算閹提養春拷問又遣主事呂好問追贓變產激變徽民事連巨室數百人下徵按問徵據法爭之所全活者甚衆

各省建祠媚忠賢揚州祠成大吏咸往叩首賀徵竟
不往父憂服闋陞僉事歸里後流寇大起徵創為連
弩活橋自行車自飛礮以資捍禦癸未闖賊入關羅
致搢紳徵已先期自題墓石曰了一道人之墓又書
全忠全孝四大字授其子永春曰吾且死死豈為名
欲汝識我心耳賊果遣使趣徵往見引佩刀自誓乃
繫永春去徵遂絕粒越七日而卒里人諡曰端節徵
素為德於鄉當永春被繫時鄉人不避賊鋒請以身

代者數百人賊乃舍之永春竟得不死

續表忠記

牛象爚字汝華涇陽諸生賊至其家爚踞樓不肯下賊舉火焚樓以逼之爚蹈火死又涇陽民趙九筵家居堡中賊至衆皆懼九筵鼓勇扞禦賊登陴九筵拒之

中矢死

賈志

常道立字修之三原人萬厯間進士仕至河南中丞政績著聞歸里值李賊入秦不屈北望神京稽首哀呼

不食而死

賈志

喬巍字維嶽三原人幼從馮少墟溫無知遊踐履篤實待異母弟極友愛居繼母喪哀毀骨立登萬厯己未進士授司農郎司餉山海關陞參政出巡川南時奢安二寇叛巍削平之以事左遷僉事後論平奢功陞副使尋擢山西參政分守冀寧道便道過里值逆闖陷省徵索不少屈與表弟王伯達僕人王崇德同日

被戮時並稱之

賈志

袁養和字祥人蓋屋人萬厯戊子舉人為屏山令火焚

獄獄中囚避於外火熄囚復歸獄人奇之擢刑曹持平不阿出守南安防澗賊修水城擢滇南憲副有疾歸里癸未逆寇自成力徵之時年八十二不屈絕粒而死

賈志

竇汝器字擢五富平人幼穎悟長尚節義以歲薦授城固司訓崇禎癸未冬李闖入關諸郡風靡汝器說邑令增陴濬隍簡練丁壯戮力拒守及欃槍雲集衆皆潰散汝器度勢危歸整冠帶望闕拜畢坐明倫堂以

待寇入賊殺縣令并執汝器脅以白刃欲降之汝器

大罵不屈遂遇害於泮池側

賈志

牛養傑岐山人事後母能孝由選貢知延津縣坐剛直

免歸闖逆之變衣冠向闕北拜罵賊死又同時南鄭

舉人席增光諸生葉燧皆不屈死

賈志

張鳳翮字健翀城固人天啓乙丑進士官江西巡撫歸

遭闖逆陷城為賊所執脅之仕抗志不從遂遇害

賈志

岳中衡城固貢生崇禎末賊至為所執呵之跪不屈令

斬之中衡曰我得死所矣復釋之誘以官中衡曰我

已成貢士猶不屈肯為汝賊官邪遂為亂刃所斃

賈志

劉長庚同州生員慷慨有志節明崇禎末李自成蹂躪

秦關長庚挺身誓衆固守城圍繼聞會城陷遊騎且

薄州衆皆奔散長庚仰天嘆曰是草莽臣委命之秋

也先謁孔子廟焚衣冠次邀族黨於家指割城內地

建祠祀先餘備烝嘗衆謂士無死法隱遁可以潔身

可以全義長庚決志不從顧其妻曰吾乏嗣納妾幸

生二子宗祧可繼善撫之死後葬我於讀書樓下又
顧謂妾雷氏爾將奈何雷慨然言願相從於地下長
庚拜謝引至書樓曰此吾平生脩習之所天地鬼神
共鑒在茲遂手刃其妾并六歲女徐自經死一時觀
者如堵莫不垂泣

賈志

解光纓字端甫韓城人性端謹師事韓令左懋第以名
節相勉會賊難避地晉中日結義士圖刺賊晉撫行
視軍光纓往說謂長安雖陷三邊宿重兵兵將中豈

遂無顏真卿郭子儀其人者願以忠義檄三邊令會
勦未果賊攫搢紳金匿之者多波及光纓挺身往見
賊不少屈繫長安掠以刑備極苦楚終不屈賊壯之
適有為賊策餌衣冠收人心者檄令受職光纓不應
辭氣益烈賊不能平遂遇害

賈志

魏國柱字鳳庭蒲城人萬厯壬子舉人幼即孝親敬兄
不事浮飾宗族稱之初令臨淮清慎自矢愛民如子
陞睢州守益勵清貞尋罷歸值賊亂被執遇害子諸

生允貺事父母極孝父為賊執追餉允貺定省不離側卒以身殉又童僕羅安隨侍國柱朝夕痛哭同時被害人咸義之

賈志

王淑景耀州人中丞國長子廕知府性穎敏學行與三水文翔鳳齊名廕職未任值闖逆陷關中偽守欲用堅不為屈與子生員肇祥同遇害

賈志

趙士達永壽人歲貢任莊浪衛教授流寇破城被執罵賊遇害又同里貢生張應泰亦被執不屈而死

賈志

齊大成鄜州諸生崇禎癸未李自成陷長安大成哭於家已復別妻子獨衣冠入文廟不食問之輒詬罵越

十日而死

延安府志

尤世威榆林人官總兵有戰功崇禎十六年李自成陷長安十月傳檄榆林是時巡撫甫罷代者未至人心恟恟時世威家居榆林道都任以衆議推世威為大將無何賊衆十萬下延安克綏德遣人說降衆未發議參將劉廷傑大呼曰賊雖破長安然三邊尚屬朝

廷中州子弟不習戰榆林天下勁兵一戰必奪其氣
然後約寧夏固原為三師以遞進賊可破也衆曰將
軍議是於是都任令於軍中曰壯士壹聽尤將軍令
世威迺簡兵誓師守具未備賊臨城下出戰敗之賊
復悉衆薄城攻戰七晝夜不下賊穿城納火炮穴中
城崩世威率衆巷戰兩日夜婦女登屋上亦彎弓助
戰都任死之世威與弟世祿劉廷傑王世欽王世官
李昌齡被執檻車送長安自成坐堂上世威等不跪

自成曰將軍皆名將佐朕共取封侯可乎世威等仰天大笑罵曰驛中小卒敢大言某等朝廷上將悔不速殺汝自成笑前解縛世欽唾曰唉驛卒勿近前污將軍衣自成怒命皆斬之榆林之陷婦女死義者數

十人城中井滿

賈志

王世欽榆林人山海總兵免官家居崇禎十六年李自成陷長安榆林守將王定棄城走世欽與尤世祿等部署諸軍守榆林城以拒自成城既陷被執檻車送

長安自成親釋其縛罵不絕口自成殺之世欽方械繫道宿長安傳舍中且歌且飲大醉顧謂驛使自今至長安幾日驛使以對仰天大笑曰行矣丈夫死當為厲鬼以殺賊聞者壯之

賈志

世欽弟洪官天津總兵

以勞卒於軍

延綏鎮志

王學書字忠吾榆林人父保字麟岡鎮守昌平及寧武薊鎮遼東總兵有戰功歿於海州學書補世職歷遷宣府總兵官尋轉天津防海總兵以老致仕林居值

闖逆攻榆學書念巖疆重地世受國恩散家資給兵
民拒賊七日城陷被掠罵不絕口遇害子國鼎字新
甫官浙江寧波道以勞瘁卒官

延綏
鎮志

鍾茂先榆林人為綏德衛管屯指揮賊至督衆固守及
賊勢熾茂先知力不支藏二匕首於左右蔽膝中賊
入茂先家陽以酒勞之左手捧觴右手拔匕首刺賊
賊負傷出走茂先入殺其妻子而自刎焉

延綏
鎮志

賀世魁榆林千戶從總督守薊門適歸值賊圍城悉力

固守攻益急城陷歸家陳衣冠取祖宗承襲號紙置
香案東向而拜曰臣力盡矣更着深衣從容縊死妻

柳氏亦殉焉

延綏
鎮志

黃廷政廷用廷弼俱黃演孫也演榆林衛指揮歷官延
綏協守出兵芹河陣亡蔭廷政襲指揮使廷用千戶
廷弼百戶李賊薄城廷政兄弟念家世忠烈力戰抗
賊廷政中炮而隕廷用廷弼益自憤勵城陷遂偕死

焉

延綏
鎮志

尤世祿字裕齋榆林人以世職起家歷任固原遼東宣
府總兵子拱極字樞寰任山海總兵家居寇至守新
添門賊從海潮寺穴城入世祿覺之募敢死士縋城
擊賊南門陷父子見執死之同時死者有原任宣府
總兵王世國山海副將楊明山海參將尤岱岱子捷
官薊鎮總兵甲申京城陷率兵奔河南志圖興復為

叛兵所殺

舊志

潘國俊漢中衛百戶官榆林副將逆闖破城死之

漢中府志

張雲鶚字元舉榆林人舉人為戶部主事督餉山海關致任歸賊至城守不屈死之子發字啓之定邊副將

先雲鶚戰死

延綏鎮志

馬應舉榆林人為撫標中軍賊薄城應舉曰孤城不可守也乞師於套以數千騎至西門眾寡不敵套人引

去賊入被擒梟於市

延綏鎮志

潘雲騰漢中人官延綏參將賊陷城與兄國奇俱死之

賈志

李淮榆林人原任西安參將值賊李過入城淮先令妻

子自縊率子出門殺賊父子皆自刎死

延綏鎮志

陳義昌榆林學生性耿直闖逆陷城義昌獨正色罵賊為賊所殺諸生以罵賊死者又有沈濬沈演白拱極

白含章

延綏鎮志

張連元榆林學生城陷偕弟連捷入漢壽亭侯廟從容縊於梁間又諸生李可柱縊死於余肅敏祠胡一魁

李引祥亦自經於家

延綏鎮志

梁文炳及弟文燭俱靖邊諸生崇禎末流寇破城欲招

致幕下皆抗節不屈而死

延綏鎮志

熊維藩字振宇威武堡人宣府參將致仕歸高賊攻堡

維藩力戰傷賊甚衆堡陷維藩自刎

延綏鎮志

台元延安衛人闖賊入城兩手握大石欲為狙擊計隣

人恐禍及縛之至家不食五日死

延綏鎮志

劉廷傑字若三彛鼎子崇禎癸未為延綏撫標參將寇逼榆林堅志固守城陷被執罵賊不屈賊支解之事

聞贈都督僉事其從弟廷夔亦投雲巖閣死焉

賈志

馬鳴節榆林人世襲百戶賦性忠勇闖兵攻城將陷鳴節將妻孥用木器廂櫃圍聚一處引柴燃火烈焰薰天鳴節持刀巷戰砍死賊兵數十力竭身跳入火焰中弟鳴廉任總督汪喬年中軍勦賊於郊縣被圍單騎馳救出入賊營者三殺死賊兵無算力竭而死

賈志

楊繡徵膚施人生員崇禎十六年闖逆破延安繡徵衣冠至公署縊死衣冠內題云所恨上有老母未葬下

有幼子未成眼觀時勢斷無苟生之理云云聞者哀

之

賈志

惠顯清澗人由步卒積功至延綏副將闖賊至激勵將士勉以忠義閉城固守城破被擒賊慰之曰若固世家子而有武畧能從我則以權將軍相授顯極口詈之磔於市從子漸時為撫邊守備亦罵賊死

延安志

赫崇德綏德州人生員聞偽官入城即具衣冠自縊於文廟為門斗救免掖至學宮觸柱而死又鳳翔一生

面詰賊官鞏煇煇為之痛哭賊聞之決杖而死又賊至三原下學令生員講書一生出曰孔孟之書教子孝教臣忠諸公相率從賊講忠孝乎講不忠不孝乎牛鞏諸賊無以對撤席而起惜未得兩生姓名云

學古

堂集

張禮字義亭威武堡人為鹽商素有行義賊至傾家貲

守城城陷被賊執罵賊而死

延安府志

李樹聲岐山人知猗氏縣廉靜不擾有德及人丁內艱

不復仕闖逆徵之使仕樹聲曰吾家六世受國恩今

安往乎即夕呼天而逝

賈志

羅世濟字虛舟平利人萬厯己酉舉人官澠池教諭素負大義剛正不阿闖賊亂起即毅然以死自誓既而澠池失陷力戰被執不屈死之子得鴻練兵守平利殺賊甚多城破與妻子俱死焉

賈志

郭天吉榆林人武進士仕至甘肅西協副將賊攻甘涼城陷天吉巷戰被擒不屈賊怒磔之

賈志

衛景瑗字仲玉韓城人天啓進士授河南推官以廉明擢御史兵部尚書楊嗣昌議加勦賊兵餉景瑗抗疏拒之訖不能用會給事中傅朝佑李如燦以劾閣臣溫體仁得罪下詔獄景瑗請釋兩臣以作敢言之氣帝大怒降行人司正屢遷至大理少卿以右僉都御史巡撫大同崇禎十七年李自成東犯太原景瑗議調兵趨控鴈門總兵不肯行寧武陷賊遂長驅抵大同總兵出降景瑗猶督麾下巷戰賊大至士皆散走

衆擁景瑗入自成營或叱之跪景瑗不為動踞坐於地大呼皇帝而哭自成好謂曰吾非有天命不至此君佐我我當益加君官景瑗瞋目曰吾期滅汝朝食肯從汝作逆耶自成見景瑗言切急命掖之出越三日再擁見自成自成又好謂曰君忠臣吾將具車騎放君還家景瑗曰國破何家可歸盍速殺我因出不意以頭搶階石血淋漓被面絕而復蘇自成又命掖之出復三日驅景瑗行至海會寺北向再拜自經死

有繼母及兩子從行賊亦不之殺也

堯峯
文鈔

石可礪字用汝城固人萬厯乙卯舉人知寶豐縣時縣
舉人牛金星居鄉肆惡又納族妹為妾被告可礪奉
審執法無徇金星懼逃投闖逆及陷西安金星欲復
舊怨遣人搜獲可礪囚禁挾餉備受酷毒可礪不屈
仍指數前事殺於紅芝驛

賈志

劉必達山陽人崇禎庚辰廷試特用授山西汾陽知縣
有聲及闖逆抵汾仗義不降投井中賊兵尾至自井

引出縛繫太原陰通書信於京口賊怒殺之

賈志

左士元耀州監生御史永圖子闖賊破州拘士元至省
勒銀助餉士元曰我乃清白吏子孫安有此即有肯
齎賊乎賊怒欲殺之見其年少有才欲脅降士元不

屈遂遇害

賈志

宋師襄耀州人萬歷丙辰進士仕順天府尹家居闖賊
入關師襄不屈被虜而東孫金臺邑諸生知師襄必
不免仗劍尾行至聞喜師襄盡節金臺亦從死祖忠

孫孝士林重之

賈志

李遇知字仲伯洋縣人萬厯庚戌進士授東明令持廉
秉公特召考選補兵科給事疏月凡十上理餉徵兵
有裨樞政丁母憂補官正崔魏煬蔽舉國如狂之日
遇知先官樞垣有疏薦鄒元標馮從吾等甫近都魏
璫嗾其同類中公以薦舉匪類獻媚東林矯旨削籍
崇禎初起禮科累陞戶尚總督倉場時不苦寇即苦
旱防盜打壩不遺餘力擢吏部尚書時時勢日危遇

知以文文山正氣歌作屏顧而泣焉都城陷自縊於
紅廟賊解縊執之劉閔宗宋企郊等迫之仕遇知不
屈遂遇害一門同死者七人遇知妻先殂妾王氏先

遇知縊死

劉如漢李
公紀略

李昌齡字仁徵咸寧人天啓辛酉舉人為河南靈寶學

諭月課諸生以忠孝大義勸率之至流寇侵城聚諸
生於明倫堂曰平日所講忠孝大義安在誰無父母
誰無妻子誰不履王土而可偷生乎每一生令監百

姓十人倡義堅守賊始退陞山西猗氏知縣令各村
社立鄉約以敦風化親詣四鄉力田者賞荒蕪者責
時旱災頻仍兼以黃鼠害稼地多菅草蕪地萬頃竭
誠祈禱霖雨時降令構訟有罪者罰捕黃鼠若干或
罰鋤菅草若干不半載悉為良田流寇煽突軍需不
繼當道有議加糧者昌齡為民請命繪圖告減文移
十數反始獲免尋以失當道意謫河南布政司檢校
未幾遷知沈丘就道會永城劉超叛鳳陽督師檄取

監軍即親赴軍前冒矢石獲叛告捷而監軍之日賊潰沈丘當道卸罪誣下刑部獄數月神京陷逆闖釋獄內諸搢紳令就選昌齡堅臥不食其子泣勸之正色曰余生平所學所講者何事余為國家罪人當死余不為國家罪人尤當死余志決矣越五日而卒

賈志

高鏗榆林人為北京神機營參將李自成犯闕鏗闔門自焚死先是鏗族父從龍任固原參將崇禎中調征流寇從龍行至三水遇賊力戰而歿諡忠勇

延安府志

劉彰本保安人貢士赴銓授涇陽訓導未出都城闖逆入京彰本囑其子雙全曰受朝廷一命之榮身屬朝廷矣今國破君亡吾不苟生兒歸幸勿以我為念遂

縊於涇陽會館

賈志

蕭偲字慎甫延安人如薰子襲錦衣指揮逆闖犯京師

偲年二十三殉難

賈志

郝允曜字覺天清澗人以祖蔭補南國學典簿歷刑部郎中多所平反以清獄忤旨謫上林簿尋復戶部主

事逆闖至不屈死

賈志

李固本字伯立洋縣人崇禎丁卯舉人歷官定州僉事

闖逆入定死之

賈志

張光斗字元圃神木人貢士天資穎異嘗遊馮少墟先生門筮仕南皮令豁荒恤殘優禮師儒擢天津監紀復調河間同知闖兵陷城欲大用抗節不屈罵賊而死其妻單氏亦與難合郡憐其忠祀名宦

賈志

李承燦華州人山海關義院口守備加遊擊崇禎末城

破死之又同里有濬縣尉李華貴新城主簿王者佐

郟城典史李嘉賓皆城破不屈而死

華州志

馮登鰲膚施人以舉人知靈壽賊陷城不屈死之其叔

父大緯訓蠡城亦罵賊死

賈志

石隆字長卿三原人少好騎射尤善古文詞癸未聯捷

憤時政擬上書為權貴所遏賊入秦曲沃李建泰督

師公慨然請纓願復三邊自黃甫川渡河聯絡榆中

靈夏曲沃不能從遂憤鬱成疾避地江南甲甲五月

聞北都陷痛哭數日不語不食三日死湖口友人劉

湘客經紀其喪

學古堂集

王被徵張少保士佩家僮也幼從少保事主極忠順闖賊陷京師被徵哭詣少保墳曰奴從主人食朝廷之澤久矣今主人之主已晏駕奴何以生為不食數日

死

韓城志

衛楨固字屏君韓城人少負奇氣喜談兵手畫山川形勢習戰陣攻守之法崇禎甲戌成進士授開封府推

官是時流寇往來村民扶攜奔走多及於難公議脩築西關城處之經南陽汝寧河南諸城皆量其地宜城者勸諭增築論守城事宜十三條撫按奇公才有警必檄與謀公受檄即戎服據鞍按視城壘所過扼塞險易悉識之十四年九月以卓異召對中左門言平寇為足國第一務帝善其對擢拜雲南道御史明年受命巡按真定等處時河南民有遭寇竄河上者楨固竭家貲以賑檄緣河州縣安輯活數十萬人甲

申正月闖逆陷河東諸郡大學士李建泰請禦之命
楨固監其軍三月京城陷誓殉國難楨固按畿南嘗
疏救參將王燝燝以兵二百隨征至是行至大石橋
遇賊數萬騎督燝兵殊死戰賊引卻已復益兵來戰
官軍盡覆楨固突圍出走追騎至躍入井中水涸不
得死為賊所執抗罵不屈賊相牛金星故中州舉人
嫌公理汴時發其惡幽公於獄中會自成西奔楨固
乃得脫入五臺山之西北峪為絕命辭遂自殺

河濱全書

劉之勃字安劉寶雞人崇禎七年進士由行人擢御史
風采清峻尤長於奏議時帝因寇亂頗崇信二氏之
勃疏言近傳營殿閣設齋醮臣竊以兵荒交迫流移
載道省土木齋醮之費以養饑民固萬年根本之圖
也以佐軍需亦一時騰飽之資也若費之無用之地
豈不重可惜耶疏出時論譴之繼上節財六議謂國
初馬以萬計草場止五六處今為額漸少而草場反
增二倍可節者一水衡工役之費歲幾百萬請察可

以停緩之工盡助軍興可節者二諸鎮兵馬潰敗時
聞而餉額不減當嚴察隱冒可節者三光祿宴享賜
賚既從儉約而監局官役額設如故日廩月餼不貲
可節者四三吳與澤潞之織造以及香蠟藥材陶器
之屬無歲不貢積之在內則為廢物輸之自下皆是
金錢可節者五監軍贊畫之官不可數計平時則以
一人而糜千百人之餉臨敵又以千百人而衛一人
之身不惟耗食兼且耗兵可節者六優旨議行十五

年正月疏參諸督撫之溺職者二月請停東廠言京師之五城及巡按御史俱有察訪之責刑部定罪大理平反此定例也今緝訪既屬東廠刑部且為承行之吏大理更屬贅員不便於官守者一律法越訴有禁一詞告二事不准非兩造俱陳不定罪今四方奸頑以所隸有司難售其奸悉赴廠投首道路遠隔數千姓名半多假捏一紙連株全家立破不便於民生者一從來尊卑相制四維乃張今緝訪所獲或以子

弟許父兄或以僕隸許家主或以部民許官府不便
於國體者一帝即命飭行未幾命之勃巡按四川甲
申年八月賊逼成都初九日賊遂入城蜀王率宮眷
投井死之勃被執賊以之勃同鄉欲強以官之勃勸
以不殺百姓改邪從正輔立蜀世子賊不從遂大罵
求死賊酷苦之終不少屈臨死語賊曰寧多剗吾肉
無濫殺百姓縛於蜀府端禮門外攢矢射殺之

續表
忠記

文郁邑諸生之勃從子也從之勃出按四川之勃遇

害文郁抱尸號慟觸樹死院吏石璞殯之西門外

鳳翔

府志

張繼孟字伯功文質之曾孫也萬厯己未進士知濰縣擢御史奉命巡江極陳江防八要以堅執不立魏璫生祠削籍逆黨敗詔補山東道御史直言糾劾出知廣西府宣慰普名聲與交趾倡亂勢甚猖獗繼孟單騎至息宰河招降之滇人懷其德立祠尸祝稍遷兩浙鹽運使加參政因忤權璫崔璘左遷保寧知府歷

川西道崇禎甲申獻賊陷成都不屈死之妻賈氏同

遇害

賈志

王勵精蒲城人崇慶知州初由選貢生授廣西府通判
仁恕善折獄歲饑毀所繫銀帶以賑及聞成都陷士
民驚竄其僕勸之去不可曰身受國恩焉所逃死賊
勢逼具朝服北向拜闕西向拜辭其家從容書於壁
曰為臣盡忠為子盡孝而今而後庶幾無愧書畢登
樓縛利刃於柱而露其鋒貯火藥於樓下危坐以待

及報賊騎渡江勵精身自舉火火烈觸刃貫脅而死

表忠

記

張耀字融我三原人萬厯癸卯舉人嘗從學於溫恭毅之門篤志力行事親至孝仕至貴州布政使值流寇張獻忠檄至耀率僚屬登陴拒守誓同一死城破耀率僕役猶格殺數賊遂被執賊逼耀降耀大聲罵曰狂賊不知天命逞目前耳我天朝臣子豈從賊乎今日惟一死耳賊怒遂縛耀怒罵如初於是磔殺耀

眷屬一十三口同時俱被害

賈志

衛脣文字祥趾韓城人崇禎辛未進士授庶吉士歷編修司業中允諭德環堵蕭然時家口近百同居五世無間言流寇四起海內瘡痍脣文方在里癸未十月逆闖入關全省瓦解即星夜赴京極陳利害時賊勢猖獗在朝猶未敢言而脣文以詞臣越俎言且將以家財輸國上以其愷切召見脣文痛哭陳勦賊之計請召四大鎮翼衛王室已而神京陷遂之江南以憂

憤死

賈志

王總衡字振乾咸寧人由廕生仕熹宗朝不附魏璫因失朝儀例止罰俸竟以革處西歸侍奉兩親備極色養璫敗寃白以親老弗仕及闖賊入秦授以官不受賊怒加刑掠體無完膚罵不絕口賊以為死置之踰日復甦避居終南山

賈志

按忠節列傳俱以殉節之先後為編次其有事蹟畧具而歲月未詳者則統列於後如宋西安朱友

恭為涇原將以兵敗不屈死明西安費邑宰以寧
羌州參將戰死鄠縣諸生靳之翰以罵賊死鄠縣
吳大猷全調鼎張奇英王福劉學鑑王良志劉慎
俱以殺賊死涇陽貢生趙友梧以守堡陷賊死延
安衛人張維忠以寧夏總兵戰敗自經死延安衛
世職指揮岳茂以大同總兵戰死延安衛世職百
戶邵復初以平遼將軍戰死膚施人孫仲嗣以階
州廣文守城死安塞貢生袁光先以滎陽訓導城

破自刎死麟遊諸生劉心潔罵賊死隴州貢生郝
珊以訓導守節死漢中衛世職指揮胡汝寧以四
川守備征氏戰死漢中舉人王彥芹以新城知縣
抗節死褒城舉人歐植以長葛教諭罵賊觸柱死
洋縣崔榮宗以蒙陰尉罵賊死鳳縣原任天津參
政辛思齊以家居罵賊死寧羌衛人張錦以寧夏
百戶征蜀寇死榆林衛世職指揮崔世榮丁碧俱
以平羅衛參將戰死榆林衛人吳國偉以副將戰

死商州諸生趙吉士以殺賊死雒南貢生張丕式
以三河訓導抗節死韓城舉人趙春芳以許州學
正罵賊死潼關衛武進士王乾以遼陽守備戰死
乾州舉人陳虞喬以南皮知縣抗節死三水貢生
秦廷輔以濟南府通判遇變死綏德衛指揮李芳
以固原遊擊戰死綏德衛世職指揮鄭東以分守
蘭州戰死綏德衛指揮沈應麒戰死綏德人張興
以總旗戰死葭州李養成以口外守備殉難死高

家堡人王琮琮子賜福以神木把總戰死神木人
張拱微以三屯營副將戰死神木貢生張正名以
汝州州判殉節死閱其姓氏迄今猶凜凜有生氣
也

本朝

田佳運長安人貢生居堡中以耕讀自適順治二年
賀逆犯省城破其堡獲之罵賊死仲子陌亦投井
死

安尼恭郿縣人生員賦性質直順治二年流寇賀琛
破城尼恭被執不屈仍大罵琛怒甚寸磔以徇至
死罵不絕口遠近哀之時寇孽未靖刼掠四出以
諸生不屈者鄠縣王圻被殺死華州趙文明自刎
死又華州民郭汝寧字君泰亦罵賊死

許國楠咸陽人順治三年隨征入閩漳泉旣下奉檄
攝漳浦令時戎馬在郊徵輸百出國楠處之裕如
未幾楊學臯變起率衆襲城城陷國楠義不辱身

赴井死

吳錦興安庠生順治三年流寇餘孽陷州城錦與州人譚達文並罵賊不屈死

李增廣鳳翔武生順治四年土寇李啓陽據麟遊清涼寺嘯聚數千人侵掠村堡道府團練鄉勇為守禦計知增廣多勇畧俾督其衆及破賊乘勝逐北馬蹶被執不屈死之妻王氏年甫二十家貧苦守教二子俱入泮夫義妻貞聞於遠邇年六十一卒

白旗郿縣人由歲貢除蘭州訓導順治五年米狇子寇蘭州城陷罵賊殉難事

聞贈國子監學錄

賜祭一壇

周基昌城固貢生順治元年英王西畧從大兵至延安二年招撫興漢暨四川保寧諸處有功三年賀珍寇漢中基昌單騎潰圍赴省請救家人悉遇害賊平授直隸保定通判七年大兵下川南調基昌

從征八年以功授叙州府知府甫半載劉文秀自滇窺蜀城陷不屈死妻王氏守節撫孤歷五十四年年七十有二卒子志道孫元侯皆遊庠

倪光友定邊人任福建連江副將順治九年與海寇戰歿於陣

孫一鵬字圖南富平人起家諸生中武科累功至參將順治初遷廣東水師副總兵十年冬進水師總兵官十一年李定國寇廣東之新會一鵬以舟師

守江門值陳奇策從海上突至一鷗率兵大戰衆寡不敵遂歿於陣事

聞贈太子太保

賜祭葬仍月給俸米以恤其家

陳有虞字嗣韶富平人順治壬辰進士授仙遊令十一年十二月朔海寇陷漳泉欲乘虛犯會城有虞曰吾城僅斗大然興福藩籬也乃集士民議固守先是鄭成功屢經招撫益肆淫掠有虞至任募鄉

勇二百人又得家丁十五人俾為長復擇鄉勇一人為百總使將之賊至輒獲士民咸倚為重至是賊百道來攻志在必克有虞晝夜登陴與士卒同臥起士卒日裹創泣戰賊屢敗次年正月朔賊大進復敗賊憤甚即城下掘地道實以火藥名地雷初五日方旦地雷大作地盡裂城頽守兵大潰有虞率餘兵巷戰至日中轉戰至城西馬蹶遂中箭死從死者家丁趙啓遜等十四人皆西北勁卒

也子常夏適以省覲入閩中途聞變事

聞贈福建按察司僉事

予祭葬常夏以蔭官戶部郎中

張占鰲洛川人順治二年拔貢生性至孝父病禱於神願以身代任湖廣荊州府通判有治劇才康熙元年大兵進剿流賊餘孽占鰲督運糧餉晝夜催趲至房縣之七連坪猝遇賊被執罵賊不屈死之

特贈按察司僉事

賜祭葬予超以蔭生令宜陽

劉本善字太素高陵人順治辛卯武舉任湖廣守備
康熙元年冬山寇竊發制府徵兵會勦本善帥兵
三百以往屢捷明年秋本善渡河迎寇遂戰歿七
年錄前功加

恩賜祭

劉偁三水人少有大志由行伍積功至總兵順治十
六年歸誠克雲南義勇前營總兵官康熙三年從

吳三桂出師征水西偁每戰輒奮戈先登賊潰走
偁單騎追之陷大澤中為賊兵環射而死事

聞給祭葬如制

李化龍字躍禹榆林人康熙三年以從征黔蜀功進
遊擊駐防建寧縣時寇孽不靖兵民疑貳化龍多
方綏輯四境安之會江右賊入盤湖隘化龍即出
兵擊賊賊夜遁化龍追至嚴塘及之疾提兵走賊
後奮騎獨出擊其中堅賊眾皆披靡俄為烏銳所

中而斃士民立祠祀焉

馬瑛武功人由副榜貢生令永嘉屢著惠政康熙十三年耿逆蠢動溫郡戒嚴瑛與副使陳丹赤協謀防禦一日集文武僚屬議城守事逆弁祖弘勲出不意殺丹赤倡衆從逆瑛不屈瞋目大罵死之逆黨進逼縣署姪穎姿僕張義保俱格鬪死事

聞贈浙江布政司參政

予祭葬如制穎姿義保並蒙優恤子逸姿以蔭官蘇松

糧道會

聖祖南巡面陳父塚殉難狀且請諡奉

旨賜諡忠勤

姚開先字堯門淳化拔貢生由臨縣令補四川鹽井
經歷吳逆叛逆黨入蜀開先不屈自縊死子謙被
掠後冒險扶櫬歸里事母王氏曲盡子道苦志力
學中癸酉鄉試早卒父忠子孝一時重之

張家蒲城人順治辛卯舉人康熙十三年任綦江知

縣吳逆竊據全蜀宗矢志不屈以憤死

邵廷儀咸寧人順治甲午舉於鄉授清澗教諭尋陞
靖遠衛教授值王輔臣兵叛偽檄促各官盡改舊
印廷義獨懷印不予以死自誓賊怒之勿責也事
平以節義聞於

朝擢香山令有善政

王弘毅行五居淳化白堡村務農膂力絕人人呼為
狼王五康熙十三年王輔臣叛五月賊至村縱掠

衆竄弘毅力敵被擒賊喜其勇啗以偽劄立碎之
瞋目罵不已遂遇害

李毓采清澗人康熙十四年朱龍叛逆緣邊城堡皆
奔潰毓采以把總率兵逆戰於綏德死之賊乘勝
陷神木營守備張光斗死之又次陷木瓜營守備
左成庫死之光斗成庫皆榆林人也

常日暄三原人康熙十四年滇逆方熾慶陽土寇作
亂犯涇原攻馮家堡三晝夜將陷日暄同魏良佐

蔣四等率鄉兵一十八人往援殺賊數十賊撤圍并全營衝殺日暄力戰鞭死渠魁并賊黨數人衆寡不敵十八人俱戰死馮堡獲全

董正第五小根俱三水人甲寅王輔臣叛平慶間日無寧字邑令林逢堯招集鄉勇為守禦計二人與焉乙卯三月寇猝至據其城鄉勇分門殺入賊營賊大敗走二人竟戰死

周士英榆林人由行伍授順德鎮標左營守備陞遊

擊逆鎮劉進忠作亂士英統兵堵截至黃岡力戰
死康熙十七年贈蔭如制

文天爵安塞人由將材授廣東左翼鎮標遊擊康熙
十五年賊孫楷宗來誘叛天爵叱之遂被殺沈屍
於海十九年贈卹有加

韓璽聖淳化人幼喜韜畧順治二年以行伍從征屢
立戰功授十總擢鄖陽守備康熙十七年檄勦竹
房至岔山與賊血戰力盡被擒時吳逆踞衡州賊

械以往逼降之不屈死贈署遊擊事

傅汝友清澗人康熙十九年六月定海將軍王之鼎
出師救永寧汝友以總兵官隨征九月城陷被執
至貴陽遂遇害事

聞贈都督同知子弘經廕衛千總大兵復貴州偏沅巡
撫韓士琦收汝友遺骸殯於旅次三十年弘經始
扶柩歸葬時同歿者總兵何成德劉奎陝西人王
永世榆林人贈廕如汝友例

王伏金咸寧人任涼州鎮屬西把截堡守備雍正元年十月隨征西寧陣亡

張先志長安人康熙戊子武解元授七里關守備雍正二年勦卓子等山土番先志獨當加爾多寺一面因道險不得入率兵十五人進覘賊壘適林中番衆突出先志奮勇衝擊矢盡力竭遇害屍無完膚雍正三年奉

旨贈加一級

賜祭葬廕一子以衛千總用

徐宗仁長安人康熙六十年由行伍授陝西督標右營把總雍正元年九月從大兵出西寧十月羅卜藏丹津寇鎮海堡又寇新城宗仁先登陷陣前後得首功甚夥十一月勦郭莽寺二年正月勦爾各隆寺二月勦西海俱有功尋以獻俘引

見賜銀幣授千總累擢山西殺虎口副將七年四月奉旨赴陝從征八年大軍進駐巴里坤宗仁統涼州兵分

駐嵯嶮磯十二月初四日賊大至宗仁飛符請援
而身督兵拒戰三晝夜殺賊數千獲馬數百匹會
各汛同時告警因出兵禦之十八日至卜羅磚井
遇賊堵戰奪回被掠人畜宗仁率師前進數遇賊
轉戰不息二十二日至紅山破賊悉兵來迎宗仁
謂據山者勝遂駐軍以待頃之賊攻急宗仁自辰
至未血戰突圍為火器傷脇而殞事

聞入祀忠勇祠給世職拜他拉布勒哈番先是宗仁同

邑李國勲者雍正元年九月由武舉同宗仁出西
寧戰鎮海堡戰新城戰郭莽寺俱有功引

見授甘肅南古城守備八年調巴里坤從征於紅山硤
遇賊苦戰中火器而斃時十二月初七日也

勅賜葬祭給世職拖沙喇哈番又督標中營千總王大
謨蒲城人興漢鎮標中營百總劉世勲興安人俱
戰歿

恩卹有加

陝西通志卷六十一